

北故

宮平

遺

考錄



藏 基

281629

北 平 考

〔明〕失 名

故 宮 遺 錄

〔明〕蕭 洵



北 京 出 版 社

一 九 六 三 年



45024412

981.03
2527

050188

北平考
故宮遺錄

〔明〕失名
〔明〕蕭洵

北京出版社出版（北京東單麻線胡同3號）北京市書刊出版業營業許可證出字第095號

北京新華印刷廠印刷 新華書店北京發行所發行

開本：850×1168 1/32·印張：2 6/16·插頁2·字數：50,000
1963年3月第1版 1963年3月第1次印刷 印數：1—5,800冊

統一書號：12071·17

定價：(7) 0.33元

出版說明

「北平考」五卷，北京圖書館藏。原書鈔本兩冊，不著撰者姓名，沒有目錄，也沒有序跋和任何題字。

本書的內容是從歷代正史中輯錄有關北京地方和宮殿的沿革，遠溯堯舜按朝代編到元末爲止。這是一本有關北京地方沿革的簡明資料書。

據我們推測，這書可能是明初人輯錄的。理由有二。一、書名作「北平」。北京地方之稱爲北平，在歷史上爲時不久，只明初（洪武三十一年，建文四年，共三十五年）稱爲北平府；自永樂元年，一直直到整個清朝，就都稱爲北京順天府了。二、本書敘述只到元末爲止（至於書中有兩處注解引了「大明一統志」，可能是後人添注的）。

原鈔本第一頁有幾方收藏者的圖章。最靠下面的圖章，也就是最早的收藏者是黃叔琳。黃，清初人，大興縣籍，康熙十一年生，乾隆二十一年卒，是相當有名的學者，著述不少。以黃叔琳所處的時代和他本人來說，對這樣一個鈔本鄭重收藏，可見是明朝人所作。

「故宮遺錄」，明初蕭洵著。蕭是江西吉安縣人，生卒不詳，洪武時爲工部郎中，後任浙江長興縣令。這書是他在洪武初年任職工部時奉命拆毀元故宮的私人紀錄。元朝宮殿情況，祇散見於幾種書中，如陶宗儀的「輟耕錄」等，但多屬零星記載。至於全面敘述的，祇有這篇「故宮遺錄」。因爲在元朝，

一般人不能入宮遍覽，所以無從記述；元朝才亡，明初又將元宮拆掉，於是又無從追述。蕭洵當時因工作關係，曾對元宮周歷了一番，記下了元宮全貌，這可以說是元明以來書籍中記述元朝宮殿最全面的一種。雖然「日下舊聞考」曾說其中有些與諸書不合者，但仍是研究北京古代宮室的重要參考資料。

「北平考」中自遼代以下，對宮室的記敘特詳。這是因為遼、金、元三代曾以北京為陪都或國都，而史籍中有關地方的敘述，除地理志和散見於列傳之外，提到地方或建築的以帝王本紀為最多。帝王的活動，一般在宮殿之內，因而輯錄的材料，宮殿部分就顯得分量重了；尤其元朝部分，篇幅最多。這樣，我們把「故宮遺錄」同時印出，在閱讀時就可與「北平考」銜接。

「北平考」是沒有刊刻過的，知者不多，印行出來，可供研究北京歷史的參考。「故宮遺錄」，我們是根據清乾隆年間刻本「知不足齋叢書」排印的。

目 錄

北平考	……	[明]失 名(一)
故宮遺錄	……	[明]蕭 洵(三)

北
平
考

北平考卷一

唐堯

幽州 書舜典：流共工於幽州。

周

薊 禮記樂記：武王克殷反商，未及下車而封黃帝之後於薊。

疏云：今涿郡薊縣是也。

燕

薊 漢書地理志：薊故燕國，召公所封。

史記燕世家：王喜二十九年，秦攻拔我薊。 秦始皇紀：二十

一年，王賁攻薊，乃益發卒詣王翦軍，遂破燕太子軍，取燕薊城。

亦名薊丘。樂毅報燕惠王書：薊丘之植，植於汶篁。水經注曰：薊城內西北隅有薊丘，因丘以名邑也。

寧臺

元英

曆室 史記樂毅傳：報燕惠王書曰：齊器設於寧臺，大呂陳於元英，故鼎反乎曆室。

正義曰：燕元英曆室二宮在幽州薊縣西四里寧臺之

下。曆音歷。

碣石宮 史記孟子荀卿傳：騶衍如燕，昭王擁彗先驅，請列弟子之座而受業，築碣石宮，身親往師之。

正義曰

碣石宮在幽州薊縣西三十里，寧臺之東。

漢

燕國

薊縣 史記項羽紀：立燕將臧荼爲燕王，都薊。 漢書地理志：薊莽曰伐戎。 薊南通齊趙，勃碣之間一都會也。

廣陽國 漢書地理志：高帝燕國，昭帝元鳳元年爲廣陽郡。 宣帝本始元年，更爲國。 莽曰廣有。

水經注言秦始臯滅

燕，以爲廣陽郡。今案史記始皇紀，三十六郡無廣陽之名，當以昭帝置者爲定。

萬載宮 漢書燕刺王旦傳：王憂懣，置酒萬載宮，會賓客羣臣妃妾坐飲。

光明殿 水經注：城有萬載宮光明殿。

端門 漢書五行志：昭帝元鳳元年九月，燕有黃鼠銜其尾舞王宮端門中，王往視之，鼠舞如故。王使吏以酒脯祠鼠，舞不休，一日一夜死。

後漢

幽州

廣陽郡 後漢書郡國志：世祖省并上谷，永平八年復。

魏書云，和帝永元六年復。

薊縣 後漢書郡國志：刺史治。

漢官云，薊陽東北二千里。

光武紀：更始二年正月，光武以王郎新盛，乃北徇薊。故廣

陽王子劉接起兵薊中以應郎。

劉虞傳：前中山相張純等與烏桓大人連盟攻薊下。公孫瓚乃築京於薊

城以備虞。

廣陽縣 水經注：濕水又東逕廣陽縣故城北。謝承後漢書曰：世祖與銚期出薊至廣陽，欲南行，即此城

也。謂之小廣陽。

晉

幽州 晉書王浚傳：謠曰：幽州城門似藏戶，中有伏屍王彭祖。

燕國

薊縣 晉書石勒載記：勒至薊，襲執王浚，乃焚燒浚宮殿，以晉尚書劉翰爲寧朔將軍，行幽州刺史，戍

薊。慕容儁載記：石虎將王他守薊，儁攻陷其城，斬他，因而都之。徙鮮卑胡羯三千餘戶於薊。慕容

寶載記：幽平之士咸請曰：願陛下與皇太子諸王止駕薊宮。

東掖門 晉書慕容儁載記：初虜有駿馬曰赭白，有奇相逸力。石季龍之伐棘城也，銚將出避難，欲乘之。

馬悲鳴蹊齧，人莫能近。銚曰：此馬見異先朝，孤常仗之濟難，今不欲者，蓋先君之意乎！乃止。季龍尋

退，銚益奇之。至是四十九歲矣。水經注：儁光壽元年。而駿逸不虧。儁比之於鮑氏驄，命鑄銅以圖其象，親爲銘贊，

鑄勒其旁，置之薊城東掖門，是歲象成而馬死。

清泉水 晉書王浚傳：成都王穎密使右司馬和演殺浚，於是與浚期，游薊城南清泉水上。薊城內西行有

二道，演浚各從一道，演與浚欲合鹵簿，因而圖之，值天暴雨，兵器霑濕，不果而還。水經注：魏氏土地記曰：薊城南七里有清泉河。魏氏土地記曰：清泉河上承桑乾河，東流與潞河合。

大城東門內劉靖碑。水經注：大城東門內道左有魏征南將軍建城鄉景侯劉靖碑。晉司隸校尉王密表：功加於民，宜在祀典。以元嘉四年九月二十日刊石建碑。

魏

幽州 魏書地形志：治薊城。

燕郡

薊縣 魏書地形志：有燕昭王陵、燕惠王陵、狼山神、戾陵陂。

濕水 水經注：濕水又東逕廣陽縣故城北，又東北逕薊縣故城南，又東與洗馬溝水合。又東逕燕王陵南，又東南高梁之水注焉。又東至漁陽雍奴縣西入笥溝。

洗馬溝水 水經注：水上承薊水，西注大湖，湖有二源，水俱出縣西北平地道泉流結西湖，湖東西二里，南北三里，蓋燕之舊池也。淥水澄澹，川庭望遠，亦爲遊囑之勝所也。湖水東流爲洗馬溝側城南東門注，昔銚期啓戟處也。其水又東入濕水。

高梁水 水經注：濕水又東南逕良鄉縣之北界，歷梁山南，高梁水出焉。水出薊城西北平地泉，東注逕燕王陵北，又東經薊城北，又東南流。魏氏土地記曰：薊東一十里有高梁之水者，其水又東南入濕水也。戾陵堰 魏書裴延儁傳：轉北平將軍幽州刺史。范陽郡有舊督亢渠，徑五十里。漁陽燕郡有故戾陵諸

堰，廣袤三十里。皆廢毀多時，莫能修復。時水旱不調，民多飢餓。延儻謂疏通舊跡，勢必可成。乃表求營造，遂躬自履行，相度水形，隨力分督，未幾而就，溉田百萬餘畝，爲利十倍。百姓至今賴之。水經注：鮑丘水首受濕水於辰陵堰，水北有梁山，山有燕刺王旦之陵，故以辰陵名堰。水自堰枝分，東逕梁山南，又東北逕劉靖碑北。其文云：魏使持節都督河北道諸軍事征北將軍建城鄉侯沛國劉靖字文恭，登梁山以觀源流，相際以度形勢，嘉武安之通渠，羨秦民之殷富，乃使帳下督丁鴻、軍士千人，以嘉平二年立遏於水道高梁河，造辰陵遏，開車箱渠。其遏表云，高梁河水者，出自并州黃河之別源，時長岸峻固，直截中流，積石籠以爲主遏，高一丈，東西長三十丈，南北廣七十餘步。依北岸立水門，門廣四丈，立水十丈。山川暴戾，則乘遏東下，平流守常，則自門北入，灌田歲二千頃，凡所封地百餘萬畝。至景元三年辛酉，詔書以民食轉廣，陸廢不贍，遣謁者樊晨更制水門，限田千頃，刻地四千三百一十六頃，出給郡縣，改定田五千九百三十頃。水流乘車箱渠，自蘄西北逕昌平東，盡漁陽潞縣，凡所潤舍四五百里，所灌田萬有餘頃。高下孔濟，原隰底平。疎之斯溉，決之斯散。導渠口以爲濤門，灑滌池以爲甘澤。施加於當時，敷被於後世。晉元康四年，君少子驍騎將軍平鄉侯弘受命使持節監幽州諸軍事，領護烏丸校尉寧朔將軍。遏立積三十六載，至五年夏六月，洪水暴出，毀損四分之一，乘北岸七十餘丈上渠車箱，所在漫溢。追惟前立遏之勳，親臨山川，指授規略，命司馬關內侯逢惲、內外將士二千人起長岸，立石渠，修立遏，治水門，門廣四丈，立水五尺。興復載利，通塞之宜，準遵舊制。凡用功四萬有餘焉。諸部王侯不召而自至，繡負而事者蓋數千人。詩載經始勿亟，易稱民忘其勞，斯之謂乎！於是二府文武之士，感秦國思鄭業之績，魏人置豹祀之義，乃遐慕仁政，追述成功。元康五年十月十一日，刊石立表，以紀勳烈，並記遏制度，永爲後式。

焉。又東南流薊，薊縣北，又東至潞縣，注於鮑丘之水。

虎眼泉 魏書常景傳：遣別將破杜維周於州西虎眼泉。

燕王陵 水經注：陵有伏道，西北出薊城中。景明中，造浮圖建刹，窮泉，掘得此道。王府所禁，莫有尋者。通城西北大陵，而是二基趾磬固，猶自高壯，竟不知何王陵。

樂毅墓 魏書盧道將傳：爲燕郡太守，下車表樂毅、霍原之墓而爲之立祠。

隋

涿郡 隋書地理志：舊置幽州，齊置東北道大行臺，後周改置總管府，大業初府廢。郭絢傳：煬帝將有

事於遼東，以涿郡爲衝要，訪可任者，拜絢涿郡丞。

薊縣 隋書地理志：舊置燕郡，開皇初廢，大業初置涿郡。

臨朔宮 隋書煬帝紀：大業七年四月庚午，至涿郡之臨朔宮。唐書羅藝傳：涿郡號富饒，伐遼兵仗多在，

而倉庫盈羨。又臨朔宮多珍寶，屯師且數萬。

唐

幽州范陽郡 唐書地理志：幽州范陽郡大都督府，本涿郡，天寶元年更名。土貢綾、綿、絹、角弓、人侵、

栗。有府十四，曰呂平、涿城、德聞、潞城、樂上、清化、洪源、良鄉、開福、政和、停驂、柘河、良杜、咸寧。

城內有經略軍，又有約降軍，本納降守捉城，故丁零川也。西南有安塞軍，有赫連城，有宗王、乾澗、殄寇

三鎮城，石堆、車坊、蒿城、河旁四戍。史思明傳：號范陽爲燕京。

薊縣 唐書地理志：望，天寶元年析置廣寧縣，三載省。至德後復置。

燕州 唐書地理志：隋於營州之境汝羅故城置遼西郡，以處粟末靺鞨降人。武德元年曰燕州，領縣三：遼西、瀘河、懷遠。土貢豹尾。是年省瀘河。六年，自營州遷於幽州城中，以首領世襲刺史。貞觀元年，省

懷遠。開元二十五年，徙治幽州北桃谷山。天寶元年曰歸德郡。建中二年，爲朱滔所滅，因廢爲縣。

雄武城 唐書安祿山傳：築壘范陽北號雄武城，峙兵積穀。

盧思臺 唐書韋挺傳：挺遣燕州司馬王安德行渠，作漕艦轉糧，自桑乾水抵盧思臺。行八百里，渠塞不可通。挺以方苦寒未可進，遂下米臺側脣之，待凍泮乃運以爲解。案：今京城西三十里盧師山，相傳爲隋沙門盧師馴伏青龍之地，以唐書考之，當即盧思臺，師乃思之誤也。桑

乾水即盧溝河。

薊門館 唐書張弘靖傳：靖軍亂，囚弘靖薊門館。

醫巫閭祠 唐書史朝義傳：自漁陽回止幽州，縊死醫巫閭祠下。

北平考卷二

遼

南京 遼史地理志：南京析津府；晉高祖以遼有援力之勞，割幽州等十六州以獻。太宗升爲南京，又曰燕京。城方三十六里，崇三丈，衡廣一丈五尺，敵樓戰櫓具。八門，東曰安東、迎春，南曰開陽、丹鳳，西曰顯西、清晉，北曰通天、拱辰。大內在西南隅。皇城內有景宗、聖宗御容殿二，東曰宣和，南曰大內。內門曰宣教，改元和。外三門曰南端、左掖、右掖，左掖改萬春，右掖改千秋，門有樓閣。毬場在其南，東爲永平館。皇城西門曰顯西，設而不開，北曰子北。西城巔有涼殿，東北隅有燕角樓，坊市、廨舍、寺觀，蓋不勝書。宋王曾上契丹事曰：自雄州白溝驛渡河，四十里至新城縣，古督亢亭之地。又七十里至涿州。北渡范水劉李河，六十里至良鄉縣。度盧溝河，六十里至幽州，號燕京。子城就羅郭西南爲之。正南曰啓夏門，內有元和殿，東門曰宣和。城中坊閤皆有樓。有閔忠寺，本唐太宗爲征遼陣亡將士所造。又有開泰寺，魏王耶律漢寧造。皆遣朝使游觀。南門外有於越王廨，爲宴集之所。門外永平館，舊名碣石館，清和後易之。南即桑乾河。

迎春門 金史郭藥師傳：藥師以宋兵六千人奄至燕京，甄五臣以五千人奮迎春門，皆入城。蕭妃令閉城門，與宋兵巷戰，藥師大敗，踰城以兔。

拱辰門 見元和殿下

元和殿 遼史太宗紀：會同三年四月庚子，至燕，備法駕入自拱辰門，御元和殿，行入閣禮。八年四月庚寅，宴將士於元和殿。 聖宗紀：統和四年五月丙戌，御元和殿，大宴從軍將校。五年正月己卯，御元和殿，大賚將士。七年二月壬子朔，上御元和殿受百官賀。 興宗紀：重熙五年十月壬子，御元和殿，以日

射三十六熊賦幸燕詩試進士於廷。

正殿 聖宗紀：統和四年五月癸酉，御正殿，大勞南征將校。

便殿 太宗紀：會同三年四月壬子，御便殿，宴晉及諸國使。

昭慶殿 太宗紀：會同三年四月壬戌，御昭慶殿，宴南京羣臣。

嘉寧殿 道宗紀：清寧五年十月壬子朔，幸南京，祭興宗於嘉寧殿。

涼殿 太宗紀：會同三年十二月丁巳，詔燕京皇城西南堞建涼殿。

臨水殿 游幸表：興宗重熙十一年閏九月，幸南京，宴於皇太弟重元第，汎舟於臨水殿宴飲。

元和門 南端門 萬春門 千秋門 聖宗紀：統和二十四年八月丙戌，改南京宮宣教門爲元和，外三門

爲南端，左掖門爲萬春，右掖門爲千秋。

長春宮 太宗紀：會同七年二月乙卯，幸長春宮。十三年正月庚午，如長春宮。十五年二月丙申朔，如長

春宮。案：遼有二長春宮，一在南京，一在長春州。若五年三月癸亥朔幸長春宮賞花釣魚，十二年三月壬申如長春宮觀牡丹，十七年正月乙卯朔如長春宮，則皆非南京之長春宮也。

內果園 聖宗紀：太平五年十一月庚子，幸內果園宴，京民聚觀。

栗園 百官志：南京栗園司典南京栗園。 蕭韓家奴傳：爲右通造，典南京栗園。

太學 百官志：南京學亦曰南京太學，太宗置。聖宗統和十三年，賜水磴莊一區。

延壽寺、憫忠寺、三學寺 聖宗紀：統和十二年四月戊戌，以景宗石像成，幸延壽寺飯僧。

興宗紀：重

熙十一年十二月己酉，以宣獻皇后忌日，上與皇太后素服飯僧於延壽、憫忠、三學三寺。

奉福寺 道宗紀：太康十年正月丙午，復建南京奉福寺浮圖。

南郊 太宗紀：會同三年五月戊子，閱騎兵於南郊。六月丙申，閱步卒於南郊。

六街 聖宗紀：太平五年，燕民以年穀豐熟，車駕臨幸，爭以土物來獻。上禮高年，惠鰥寡，賜酺飲，至夕，

六街燈火如晝。士庶嬉遊，上亦微行觀之。

北市 食貨志：太宗以燕城北有市，百物山俯，命有司治其征。

析津府 析津縣 宛平縣 聖宗紀：開泰元年十月甲午朔，改幽都府爲析津府，薊北縣爲析津縣，幽都縣

爲宛平縣。

耶律淳墓 天祚帝紀：耶律淳葬燕西香山永安陵。

北平考卷三

金

中都 金史地理志：中都，遼會同元年爲南京，開泰元年號燕京。海陵貞元元年定都，以燕乃列國之名，不當爲京師號，遂改爲中都。天德三年，始圖上燕城宮室制度。三月，命張浩等增廣燕城。城門十三，東曰施仁、曰宣曜、曰陽春，南曰景風、曰豐宜、曰端禮，西曰麗澤、曰顥華、曰彰義，北曰會城、曰通玄、曰崇智、曰光泰。海陵紀：正隆四年二月丁未，修中都城。

施仁門見朝日壇下

毅英傳：率騎從出施仁門，駐兵通州，見世宗於三河。

陽春門 章宗紀：泰和八年八月乙酉，有虎至陽春門外，駕出射獲之。

景風門見風雨雷師、高禩壇下

豐宜門見南郊壇及萬寧宮下

端禮門見風雨雷師壇下

麗澤門見武成王廟下

元史王磐傳：公卿百官出送麗澤門外。

彰義門見夕月壇下

金史紇石烈執中傳：分其軍爲三軍，由彰義門入，自將一軍由通玄門入。

通玄門見北郊壇下

衛紹王紀：大安三年二月，通玄門重關折。九月，蒙古兵至中都。十月，遣泰州刺史尤

虎高琪屯通玄門外。至寧元年五月，起胡沙虎即紇石烈復爲右副元帥，領武衛軍三千人屯通玄門外。八月

壬辰，胡沙虎自通玄門入弑帝。抹撚盡忠傳：中都妃嬪皆束裝至通玄門。元史世祖紀：至元十九年

五月，追治阿合馬罪，剖棺戮其屍於通玄門外。阿合馬傳同。

崇智門見興德宮下

金史地理志：大定四年十月，命都門外夾道重行植柳各百里。

南郊圜丘壇 禮志：在豐宜門外，當闕之巳地。圓壇三成，成十二陛，各按辰位。壇牆三匝，四面各三門。

齋宮東北厨、庫南壇壝皆以赤土汙之。常以冬至日合祀昊天上帝皇地祇於圜丘。世宗紀：大定十四年

十一月丁亥，有事於圜丘。章宗紀：承安元年十二月戊戌，有事於南郊。二年十一月甲辰，冬至，有事

於南郊。泰和二年九月癸亥，以皇子生，親謝南北郊。

北郊方丘壇 禮志：在通玄門外，當闕之亥地。方壇三成，成爲子午卯酉四正陛，方壝三周，四面亦三門。

以夏至日祭皇地祇於方丘。世宗紀：大定三年九月丁酉，以重九拜天於北郊。四年五月己酉，命參知

政事石琚等於北郊望祭禱雨。六月甲子，以雨足命有司祭謝嶽鎮海瀆於北郊。章宗紀：明昌元年五月

甲子，以祈雨望祭嶽鎮海瀆於北郊。三年三月丁酉，以祈雨望祭嶽鎮海瀆於北郊。四月丁卯，復以祈雨

望祭嶽鎮海瀆山川於北郊。承安元年三月丁酉，不雨，遣官望祭嶽鎮海瀆於北郊。四月己卯，復遣官望

祭嶽鎮海瀆於北郊。二年四月丙辰，命有司祈雨，望祭嶽鎮海瀆於北郊。泰和元年六月辛卯，祈雨於北

郊。四年三月乙酉，祈雨於北郊。四月丙子，以祈雨望祭嶽鎮海瀆於北郊。五月乙丑，祈雨於北郊。

朝日大明壇 禮志：在施仁門外之東南，當闕之卯地。門壝之制皆同方丘。以春分朝日於東郊。

夕月夜明壇 禮志：在彰義門外之西北，當闕之西地。掘地汙之，爲壇其中。以秋分夕月於西郊。

社稷壇 禮志：大定七年七月，建社稷壇於中都。社爲制，其外四周爲垣，南向開一神門，門三間，內又四周爲垣，東西南北各開一神門，門三間，各列二十四戟。四隅連飾罍，無屋，於中稍南爲壇位，令三方廣闊，一級四階，以五色土各飾其方，中央覆以黃土，其廣五丈，高五尺。其主用白石，下廣二尺，剡其上，形如鐘，埋其半，壇南栽粟以表之。近西爲稷壇，如社壇之制，而無石主。四墼門各五間，兩塾三門，門列二戟。壇有角樓，樓之面皆隨方色飾之。饌幔四楹在北墼門，西北向，神厨在西墼門外，南向，廡在南圍牆內，東西向。有望祭堂三楹在其北。雨則於是堂望拜。堂之南北各爲屋二楹，三獻及司徒致齋幕次十也。堂下南北相向有齋舍二十楹，外門止一間，不施鴟尾，祭用春秋二仲月上戊日。

風雨雷師壇 禮志：明昌五年，爲壇於景風門外東南闕之巽地。歲以立春後丑日祀風師。又爲壇於端禮門外西南闕之坤地，以立夏後申日祀雨師，是日祭雷師於位下。

高禘壇 禮志：明昌六年，章宗未有子。尙書省臣奏行高禘之祀，築壇於景風門外東南端，當闕之卯辰地，與園丘東西相望。壇如北郊之制，歲以春分日祀青帝、伏羲氏、女媧氏凡三位，壇上南向西上，姜嫄、簡狄位於壇之第二層，東向北上。

太廟 禮志：貞元初，海陵遷燕，乃增廣舊廟，奉遷祖宗神主於新都。三年十一月丁卯，奉安於太廟。大定十一年十一月，郊祀前一日朝享太廟。

衍慶宮 禮志：海陵天德四年，有司言燕京興建太廟，復立原廟。三代以前無原廟制，至漢惠帝始置廟於長安渭北，薦以時果，其後又置於豐沛，不聞享薦之禮。今兩都告享，宜止於燕京所建原廟行事。於是名

其宮曰衍慶，殿曰聖武，門曰崇聖。

章宗紀：泰和二年正月乙卯，始朝獻於衍慶宮。

祭祀謂之朝獻。

七月乙卯，

朝獻於衍慶宮。三年正月丁丑，朝獻於衍慶宮。七月壬申，朝獻於衍慶宮。四年七月戊辰，朝獻於衍慶

宮。五年正月庚申，謁衍慶宮。壬申，朝獻於衍慶宮。五月丁亥，以出師親告於衍慶宮。七月甲申，朝獻

於衍慶宮。七年正月甲申，朝獻於衍慶宮。七月庚辰，朝獻於衍慶宮。八年正月壬申，朝謁於衍慶宮。

六月甲戌，謁謝於衍慶宮。

獲宋韓侂胄首。

七月乙巳，朝獻於衍慶宮。

宣宗紀：貞祐二年五月乙亥，詣原廟奉

辭。

聖武殿 禮志：禮官導太宗御容於聖武殿，行禮畢，以次奉安於丕承殿。

世宗紀：大定十四年十月乙卯

朔，詔圖畫功臣二十人於衍慶宮聖武殿之左右廡。

神御殿 世宗紀：大定十七年正月戊申，詔於衍慶宮聖武殿西建世祖神御殿；東建太宗、睿宗神御殿。

天慶殿 禮志：睿宗御容奉安於天慶殿。

天興殿 禮志：宣徽使設御幄於天興殿門外稍西。宣徽使導皇帝由天興門正門入自東階升殿。

丕承殿 見聖武殿下

崇聖閣 禮志：禮官率太廟署官等詣崇聖閣奉世祖御容。

燕昌閣 禮志：大定二十一年閏三月，奉旨：昭祖、景祖奉安燕昌閣上，肅宗、穆宗、康宗奉安閣下，明肅皇

帝奉安崇聖閣下。

宮城 地理志：天德三年，張浩等取真定府潭園材木，營建宮室及涼位十六。應天門十一楹，左右有樓，

門內有左右翔龍門及日華、月華門，前殿曰大安，左右掖門，內殿東廊曰敷德門。大安殿之東北爲東宮，

正北列三門，中曰粹英，爲壽康宮，母后所居也。西曰會通門，門北曰承明門，又北曰昭慶門。東曰集禧門，尙書省在其外。其東西門左右嘉會門也。門有二樓，大安殿後門之後也。其北曰宣明門，則常朝後殿門也。北曰仁政門，旁爲朶殿，朶殿上爲兩高樓，曰東西上閣門，內有仁政殿，常朝之所也。宮城之前廊東西各有二百餘間，分爲三節，節爲一門。將至宮城，東西轉各有廊百許間。馳道兩旁植柳，廊脊覆碧瓦，宮闕殿門則純用碧瓦。應天門舊名通天門，大定五年更。七年，改福壽殿曰壽安宮。明昌五年，復以隆慶宮爲東宮，慈訓殿爲承華殿。承華殿者，爲皇太子所居之東宮也。泰和殿，泰和二年更名慶寧殿，又有崇慶殿。魚藻池瑤池殿位，貞元元年建，有神龍殿，又有觀會亭，又有安仁殿、隆德殿、臨芳殿。皇統元年，有元和殿。有常武殿，有廣武殿，爲擊毬習射之所。

應天門 章宗紀：明昌六年二月丁丑，震應天門右鴟尾。泰和八年四月，宋獻韓侂胄等首於元帥府。五月丁未，御應天門，備黃麾立仗受之。宣宗紀：貞祐元年十二月丁酉朔，上御應天門，詔諭軍士。禮志：朝享儀：鑾駕出宮前一日，有司設大駕鹵簿於應天門外，尙輦進玉輅於應天門內。拜赦儀：宣赦日於應天門外設香案。天文志：大定七年四月戊辰朔，日食，伐鼓應天門內。九年八月甲申朔，日當食，以雨不見，伐鼓於社，用幣於應天門內。

翔龍門 禮志：冊皇太子儀：皇太子乘輿至翔龍門。

大安門 禮志：受尊號儀：設羣臣次於大安門外，奉迎冊寶至應天門。

貞元殿 世宗紀：大定元年十二月丁巳，至中都。己未，御貞元殿，受羣臣朝。二年四月辛巳，宴夏使貞

元殿。自此以後即無貞元殿之稱，或以海陵年號爲嫌而改之也。

大安殿 世宗紀：大定七年正月壬子，上服袞冕，御大安殿，受尊號册寶禮。二十九年正月己亥，殞於大安殿。章宗紀：大定二十七年三月，世宗御大安殿，授皇太孫册。明昌四年九月甲子朔，天壽節，御大安殿，受朝賀。衛紹玉紀：即位於柩前，明日羣臣朝見於大安殿。禮志：受尊號儀：百官習儀於大安

殿庭。册皇太子儀：設儀座於大安殿。五行志：大定五年六月甲辰，大安殿楹產芝，其色如玉。

丕承殿 海陵紀：貞元三年十月己卯，梓宮至中都，以大安殿爲丕承殿。十一月乙巳朔，梓宮發丕承殿。

戊申，山陵禮成。

案：此即大安殿而暫易其名，非衍慶宮之丕承殿也。

紫宸殿 章宗紀：承安元年七月庚辰，御紫宸殿受賀。二年七月戊辰，天壽節，御紫宸殿受朝。

元和殿 禮志：受尊號儀：帝服袞冕御元和殿。

案：此恐非魚藻池之元和殿。

慶和殿 世宗紀：大定二十八年三月丁酉朔，萬春節，御慶和殿，受羣臣朝。十二月乙亥，上不豫。乙酉，詔皇太孫璟攝政，居慶和殿東廡。章宗紀：泰和七年正月辛巳，詔御史大夫崇肅等十有四人同對於慶和殿。顯宗紀：大定二十五年十月庚戌朔，宰相以下朝見世宗於慶和殿。后妃傳：泰和二年十二月

丁丑，御慶和殿浴皇子。紇石烈志寧傳：大定八年十月，進幣，宴百官於慶和殿。章宗諸子傳：洪裕

大定二十六年生，滿三月，宴於慶和殿。泰和二年，皇子忒隣生，滿百日，宴於慶和殿。僕散揆傳：召揆

赴闕，戒以師期，宴於慶和殿。內族襄傳：宴慶和殿，上親舉酒飲，解所服玉貝佩刀以賜。徒單克寧

傳：大定二十五年十一月庚申，立皇太孫，賜六品以上宴於慶和殿。

福安殿 世宗紀：大定二十九年正月癸巳，上崩於福安殿。章宗紀：泰和八年十二月丙辰，上崩於福

安殿。

仁政殿 世宗紀：上謂宰臣曰：宮殿制度苟務華飾，必不堅固。今仁政殿遼時所建，全無華飾，但見它處歲歲修完，惟此殿如舊。以此見虛華無實者不能經久也。 宣宗紀：貞祐元年閏月戊辰朔，拜日於仁政殿。

廣仁殿 世宗紀：大定十六年二月戊午，上御廣仁殿。 章宗紀：泰和七年正月壬午，詔百官同對於廣仁殿。

太和殿太一作泰 海陵紀：貞元三年十一月丙辰，宴百官於太和殿。 世宗紀：大定二年正月辛未，御太和殿，宴百官宗戚命婦。 章宗紀：承安四年五月壬辰朔，命奏事於泰和殿。 張行信傳：泰和四年四月，召見於太和殿。

厚德殿 五行志：大定二年閏二月辛卯，神龍殿十六位焚，延及太和、厚德殿。

神龍殿 世宗紀：大定二十八年三月丁酉朔，宴於神龍殿。 諸王公主以次捧觴上壽。 后妃傳：泰和二年八月丁酉，元妃生皇子忒隣，宴五品以上於神龍殿，六品以下宴於東廡下。 海陵諸子傳：光英生日宴百官於神龍殿。 壽益溫敦乙迭傳：大定二年，宮人稱心等於十六位放火，延燒太和、神龍殿。 趙興祥傳：有司乞罷修神龍殿涼位工役，上即日使興祥傳詔罷之。

魚藻殿 章宗紀：泰和三年五月壬午，以重五拜天射柳，上三發三中，四品以上官侍宴魚藻殿。 張浩傳：賜宴於魚藻池。

常武殿 禮志：拜天：金因遼舊俗，以重五、中元、重九日行拜天之禮。 重五於鞠場，中元於內殿，重九於都城外。 其制刻木爲盤，如舟狀，赤爲質，畫雲鶴文，爲架高五六尺，置盤其上，薦食物其中，聚宗族拜之。

19

若至尊則於常武殿築臺爲拜天所。世宗紀：大定三年五月乙未，以重五幸廣樂園射柳，皇太子親王百

官皆射，勝者賜物有差。上復御常武殿賜宴擊毬，自是歲以爲常。顯宗紀：大定十八年四月戊申，擊毬

常武殿。七年五月甲辰，侍宴於常武殿。馬貴中傳：世宗擊毬於常武殿。

臨武殿 章宗紀：泰和元年五月甲寅，擊毬於臨武殿。八年十一月癸卯，御臨武殿試護衛。劉璋傳：上

將擊毬於臨武殿，聞璋卒而止。

垂拱殿 世宗紀：大定十四年四月乙亥，上御垂拱殿。

崇政殿 路鐸傳：召對於崇政殿。

清輝殿 太祖諸子傳：世宗召皇太子諸王侍食於清輝殿。

慶春殿 完顏守道傳：懇求致仕，特賜宴於慶春殿。

天香殿 完顏匡傳：朝京師，賜宴於天香殿。

瑤光殿 章宗紀：承安二年六月庚戌，詔罷瑤光殿工作。

香閣 世宗紀：大定二十六年十二月甲申，上退朝御香閣。章宗紀：承安四年三月，戶部尙書孫鐸、郎

中李仲略、國子祭酒趙忱始轉對香閣。泰和三年十月，右丞僕散揆至自北邊。丙辰，召至香閣慰勞之。

食貨志：泰和八年，以吏部尙書賈益謙等十三員分路同本路按察司官一員，推排民戶物力。上召上香閣

親諭之。徒單克寧傳：大定二十五年十一月戊午，宰相入見於香閣。既退，克寧請屏左右，奏立皇太

孫。韓錫傳：授同知河間府事，引見於香閣。孟鑄傳：入爲御史中丞，召見於香閣。宗端修傳：遷

大理丞，召見於香閣。

賈益謙傳，完顏伯嘉傳，並同食

貨志。

壽康宮 海陵紀：貞元三年十月丙子，皇太后至中都，居壽康宮。十一月乙未，上朝太后於壽康宮。

隆慶宮 章宗紀：大定二十九年正月戊午，名皇太后宮曰仁壽。二月戊辰，更名曰隆慶宮。

東宮 世宗紀：大定七年七月丙辰，幸東宮。己未，幸東宮視皇太子疾。十月辛酉，勅有司於東宮涼樓前增建殿位。孟浩諫曰：皇太子雖爲儲貳，宜示以儉德，不當與至尊宮室相伴。乃罷之。八年十一月乙丑，

幸東宮。十年十一月甲申，幸東宮。十一年十一月戊寅，幸東宮。十五年十一月乙卯，幸東宮。二十三

年十月庚戌，幸東宮。顯宗紀：大定二十五年六月庚申，崩於承華殿。章宗紀：明昌五年正月丁亥，

改隆慶宮爲東宮，慈訓殿爲承華殿。紇石烈志寧傳：大定七年十一月八日，皇太子生日，宴羣臣於東

宮。徒單克寧傳：大定十一年十一月，皇太子生日，世宗置酒東宮。馬貴中傳：大定十年十一月，皇

太子生日，世宗宴百官於東宮。紇石烈執中傳：執中以皇太子儀仗迎莊獻太子入居東宮。

興德宮 世宗紀：大定二十一年二月乙巳，以元妃李氏之喪，致祭興德宮。后妃傳：二月戊子，元妃李

氏薨於長春宮。乙未，入自崇智門，殯於興德宮西位別室。庚子，上至京師，幸興德宮致奠。

承天門 五行志：正隆六年六月甲戌，大風毀承天門鴟尾。

宣和門 禮志：受尊號儀：恭謝祖廟還御宣和門。

宣華門 海陵紀：正隆元年二月庚辰，御宣華門觀迎佛。章宗紀：承安四年二月庚午，御宣華門觀迎

佛。禮志：受尊號儀：導引冊寶牀由宣華門入。后妃傳：知近侍局副使徒單張僧遣人召平章已到宣

華門外。蕭裕傳：執白答出宣華門。

宣陽門 五行志：泰和四年三月丁卯，大風毀宣陽門鴟尾。

寶昌門 海陵紀：貞元三年，登寶昌門觀角觝。后妃傳：海陵登寶昌門樓，殺昭媛察八。鄭子聃傳：海

陵御寶昌門臨軒觀試。

東華門 衛紹王紀：大安三年二月，東華門重關折。紇石烈執中傳：執中命聚薪焚東華門。完顏高

傳：中都圍急，詔於東華門置招賢所，內外士庶皆得言事。

廣陽門 衛紹王紀：至寧元年八月壬辰，胡沙虎殺知大興府徒單南平、刑部侍郎徒單沒撚於廣陽門西。

紇石烈執中傳：徒單南平行至廣陽門西富義坊，馬上與執中相見，執中手槍刺殺之。

拱辰門 衛紹王紀：崇慶元年七月辛未，有風自東來，吹帛一段，高數十丈，飛動如龍，墜於拱辰門內。

清夷門 五行志：大安三年二月乙亥，夜大風從西北來，發屋拔木，吹清夷門關折。

宣聖廟

武成王廟 禮志：泰和六年詔建昭烈武成王廟於闕庭之右麗澤門內。

女直太學 世宗紀：大定二十八年四月癸未，命建女直太學。

天長觀 章宗紀：承安元年九月丁丑朔，幸天長觀。二年七月壬寅朔，幸天長觀，建普天大醮。泰和元

年二月壬申，幸天長觀。

太極宮 章宗紀：泰和三年十二月己酉，賜天長觀額爲太極宮。四年三月戊寅，幸太極宮。八月丁巳，幸

太極宮。五年正月乙丑，幸太極宮。七年三月戊子，幸太極宮。

玄真觀 后妃傳：泰和二年十二月癸酉，設醮於玄真觀。

玉虛觀 章宗紀：泰和二年十一月甲子，幸玉虛觀。

憫忠寺 選舉志：大定十三年八月丁丑，於憫忠寺策試女直進士。寺舊有雙塔，進士入院之夜半，聞東塔上有聲如音樂，西達於宮。考試官侍御史完顏蒲涅等曰：文路始開而有此，得賢之祥也。完顏綱傳：胡沙虎遷衛紹王於衛邸，召綱，因之憫忠寺。

天王寺 鄴陽、完顏石古乃傳：至寧元年八月，紇石烈執中作亂，入自通玄門。是日變起倉卒，中外不知所爲。鄴陽、石古乃往天王寺召大漢軍五百人赴難，與執中戰於東華門外。

慶壽寺 章宗紀：大定二十九年六月丁酉，幸慶壽寺。明昌元年六月壬辰，奉皇太后幸慶壽寺。

大悲閣 五行志：大安二年十一月，大悲閣幡竿下石隙中火出，高二三尺，人近之即滅，凡十餘日。自是都城連夜燔熱二三十處。三年三月戊午，大悲閣災，延燒萬餘家，火五日不絕。

離宮 地理志：京城外離宮有大寧宮。大定十九年建，後更爲寧壽，又更爲壽安。明昌二年，更爲萬寧宮。瓊林苑有橫翠殿，寧德宮。西園有瑤光台，又有瓊華島，又有瑤光樓。皇統元年有宣和門。正隆二年有

宣華門，又有撒合門。

此宣華門與前名同而地異。

大寧宮 世宗紀：大定十九年五月戊寅，幸大寧宮。二十年四月己亥，大寧宮火。張僅言傳：護作大寧

宮，引宮左流泉溉田，歲獲稻萬斛。

壽安宮 世宗紀：大定二十一年四月壬申，幸壽安宮。二十三年四月壬戌，幸壽安宮。二十八年三月甲

寅，幸壽安宮。章宗紀：大定二十九年七月乙酉，太后幸壽安宮。明昌元年三月壬午，如壽安宮。四

月戊戌，如壽安宮。二年四月辛卯，幸壽安宮。移刺履傳：世宗崩，遺詔移梓宮壽安宮。章宗詔百官

議，皆謂當如遺詔。履獨曰：非禮也。天子七月而葬，同軌畢至。其可使萬國之臣朝大行於離宮乎？上

曰：朕日夜思之，舍正殿而奠於別宮，情有所不忍，且於禮未安。遂殯於大安殿。

萬寧宮 章宗紀：明昌二年四月庚子，改壽安宮名萬寧。壬寅，如萬寧宮。三年三月丁亥，如萬寧宮。四年四月庚戌，如萬寧宮。六年三月丙申，如萬寧宮。五月丙戌，命減萬寧宮陳設九十四所。承安元年三月丁酉，如萬寧宮。二年四月甲寅，如萬寧宮。三年三月甲寅，如萬寧宮。七月己酉，如萬寧宮。八月戊寅，如萬寧宮。四年四月戊辰，如萬寧宮。五年三月丙寅，如萬寧宮。泰和元年二月癸酉，如萬寧宮。二年四月癸卯，如萬寧宮。三年三月庚辰，如萬寧宮。四年三月丁亥，如萬寧宮。四月壬戌，萬寧宮端門災。七月壬申，如萬寧宮。五年四月戊子朔，如萬寧宮。六年三月己亥，如萬寧宮。七年三月壬寅，如萬寧宮。八月四月庚戌，如萬寧宮。元史石抹明安傳：攻萬寧宮克之，取富昌、豐宜二關。

永安宮 金史世宗紀：大定二十六年四月己未，幸永安宮。

建春宮 地理志：大興有建春宮。章宗紀：承安元年二月己巳，幸都南行宮春水。三年正月丙辰，如城南春水。己未，名行宮曰建春。二月己巳朔，幸建春宮。四年二月乙丑，如建春宮。辛未，如建春宮。戊

寅，如建春宮。庚辰，上諭點檢司曰：自蒲河至長河及細河以東，朕常所經行，官爲和買其地，令百姓耕之，仍免其租稅。乙酉，如建春宮。三月己亥，如建春宮。泰和二年正月甲戌，如建春宮。三年正月庚辰，如建春宮。五年二月己亥，如建春宮。七年二月癸亥，如建春宮。八年二月甲寅，如建春宮。八月癸酉，如建春宮。元史石抹明安傳：駐軍於京南建春宮。

東園 金史章宗紀：泰和七年五月己卯，幸東園，射柳南園。世宗紀：大定二十五年九月己酉，上臨奠宣孝皇太子於熙春園。顯宗紀：九月庚寅，殯於南園熙春殿。己酉，世宗至自上京，未入國門，先至熙

春殿致奠，慟哭久之。章宗紀：明昌三年三月癸未，幸熙春園。

廣樂園 世宗紀：大定三年五月乙未，以重五幸廣樂園射柳。五行志：大定二十三年正月辛巳，廣樂園

燈山焚，延及熙春殿。

南苑 劉頰傳：南苑有唐舊碑，書貞元十年御史大夫劉恹葬。上見之曰：苑中不宜有墓。頰家本恹後，詔賜頰錢三百貫改葬之。

西園 章宗紀：承安二年三月庚寅，幸西園閱軍器。泰和七年三月甲辰，幸西園。

西苑 章宗紀：明昌元年三月乙巳，擊毬於西苑。五月戊午，拜天於西苑，射柳擊毬。

後園 章宗紀：明昌六年十二月庚辰，幸後園閱軍器。

北苑 章宗紀：明昌五年四月壬辰朔，幸北苑。

賈鉉傳：泰和二年，興陵崇妃薨，上欲成服苑中，行登門送喪之禮。以問鉉。鉉對曰：故宋嘗行此禮，古無是也。遂已。此條汎言苑中，今附於此。

芳苑 章宗紀：泰和二年正月庚申，幸芳苑觀燈。

瑞雲樓 楊伯雄傳：海陵登瑞雲樓納涼，命伯雄賦詩。

環秀亭 章宗紀：承安元年六月庚午，幸環秀亭觀稼。

西橫門 章宗紀：承安二年閏月甲午，出西橫門觀稼。

羣牧監 元史太祖紀：六年十月，襲金羣牧監，驅其馬而還。

高橋 金史世宗紀：大定十六年正月庚午，上按鷹高橋，見道側醉人墜驢而臥，命左右扶而乘之，送至其

家。 紇石烈執中傳：大元游騎至高橋。

土魯原 后妃傳：世宗葬明德皇后於宛平縣土魯原。 大定十二年五月，車駕幸土魯原致奠。

楊村 后妃傳：皇后梓宮至近郊，車駕如楊村，致祭海王莊。 后妃傳：大定二十一年二月甲申，葬元妃

李氏於海王莊。 丙戌，上如海莊燒飯。 衛紹王紀：大安元年七月，幸海王莊，臨奠魯國公主二燕王墓。

世宗紀：大定九年二月丙申，詔改葬漢二燕王於城東。 蔡珪傳：初兩燕王墓舊在中都東城外，海陵廣京

城，圍墓在東城內，前嘗有盜發墓。 大定九年，詔改葬於城外。 俗傳六國時燕王及太子丹之葬，及啓

壙，其東墓之柩題其端曰燕靈王舊。 舊，古柩字，通用。 乃西漢高祖子劉建葬也。 其西墓蓋燕康王劉嘉

之葬也。 珪作兩燕王墓辯，據葬制名物款刻甚詳。

佛巖寺 李英傳：貞祐二年正月，乘夜與壯士李雄等四百九十人出城，緣西山進至佛巖寺。 令李雄等招

募軍民，旬日得萬餘人。

北平考卷四

元

大都 世祖紀：中統二年十月，修燕京舊城。至元元年八月乙卯，詔改燕京爲中都。四年正月，城大都。九年二月壬辰，改中都爲大都。二十年六月丙申，發軍修完大都城。二十一年七月，命樞密院差軍修大都城。成宗紀：元貞二年十月甲辰，修大都城。英宗紀：至治二年三月戊寅，修都城。順帝紀：至正

三年七月戊辰，修大都城。十年十二月壬午朔，修大都城。十九年十月庚申朔，詔京師十一門皆築甕城，造吊橋。地理志：大都唐幽州范陽郡，遼改燕京，金遷都爲大興府。元太祖十年，克燕，初爲燕京路總

管大興府。太宗七年，置版籍。世祖至元元年，中書省臣言：開平府闕庭所在，加號上都，燕京分立省部，亦乞正名。遂改中都。其大興府仍舊。四年，始於中都之東北置今城而遷都焉。九年改大都，十九年置留守司，二十一年，置大都路總管府。京城右擁太行，左挹滄海，枕居庸，奠朔方。城方六十里，十一門，正南曰麗正，南之右曰順承，南之左曰文明，北之東曰安貞，北之西曰健德，正東曰崇仁，東之右曰齊化，東之左曰光熙，正西曰和義，西之右曰肅清，西之左曰平則。

麗正門

祭祀 見南郊下

五行志：順帝至正十年，京師麗正門樓上忽有人妄言災禍。鞠問之，自稱薊州人，

已而不知所往。

順承門 順帝紀：至正二十四年七月丁亥，白鎖住扈從皇太子出順承門，由雄霸河間取道往襄寧。九月辛酉朔，宦官思龍宜潛送宮女伯忽都出自順承門，以達於皇太子。 朴賽因不花傳：大明兵逼京師，詔朴賽因不花以兵守順承門。

齊化門 文宗紀：九月丙子，帝出齊化門視師。 程鉅夫傳：命廷臣以下飲餞於齊化門外，給驛南還。

丁好禮傳：大明兵入京城，大將召好禮，不肯行，昇至齊化門，抗辭不屈而死。

光熙門 順帝紀：至正二十四年三月甲辰，皇太子率侍衛兵出光熙門，東走古北口。

平則門 順帝紀：至正二十四年七月丙戌，白鎖住引兵入平則門。二十五年八月丁亥朔，竹貞、貂高軍至城外，命軍士緣城而上，碎平則門鍵。

和義門 見社稷壇下

肅清門 燕鐵木兒傳：凱旋，入自肅清門。

安貞門 程鉅夫傳：賜地京師安貞門以築居室。

健德門 順帝紀：至正二十四年四月庚戌，禿堅帖木兒陳兵自健德門入，覲帝於延春閣，慟哭請罪。七月

戊子，李羅帖木兒駐兵健德門外，與禿堅帖木兒、老的沙入見帝於宣文閣。 李羅帖木兒傳並同。 二十八年閏月

丙寅，帝御清寧殿，集三宮后妃、皇太子、皇太子妃，同議避兵北行。至夜半，開健德門北奔。 祭祀志：

若駕幸上都，三獻官以下及諸執事官則詣健德門外。 兵志：車駕行幸上都，太僕卿以下皆從，先驅馬

出健德門外，取其肥可取乳者以行。 馬札兒白傳：建寺都城健德門東。 脫脫傳：以私財造大壽元忠

國寺於健德門外，爲皇太子祝釐。 陳祖仁傳：京城破，將出健德門，爲亂軍所害。 阿合馬傳：遣數騎

出關北行十餘里，遇僞太子盡殺之，奪其馬南入健德門。

兵志：武宗至大四年六月，樞密院官奏：嘗奉

旨令各門置軍守備，臣等議：探馬赤軍士去其所戍地遠，卒莫能至，擬發阿速唐兀等軍參漢軍用之，各門置五十人。制可。后妃傳：順帝完者忽都皇后；京城大饑，后出金銀粟帛，命資政院使朴不花於京都十

一門置冢，葬死者遺骸十餘萬。

南郊 祭祀志：世祖十二年十二月，以受尊號遣使豫告天地，下太常檢討唐宋金舊儀。於國陽麗正門東

南七里建祭臺，設昊天上帝皇地祇位二，行一獻禮。自後國有大典禮，皆即南郊告謝焉。三十一年，成宗即

位。夏四月壬寅，始爲壇於都城南七里。甲辰，遣司徒兀都帶率百官爲大行皇帝請諡南郊。世祖紀爲告天

請諡之始。大德六年春三月庚戌，合祭昊天上帝、皇地祇、五方帝於南郊，遣左丞相哈喇哈孫攝事。成宗紀

爲攝祀天地之始。十一年，武帝即位，秋七月甲子，命御史大夫鐵古迭兒即南郊告謝天地。爲即位告謝之

始。至大三年十一月丙申，有事於南郊，以太祖配五方帝日月星辰從祀。武宗紀文宗至順元年十月辛酉，

始服大裘袞冕，親祀昊天上帝於南郊，以太祖配。文宗紀自世祖混一六合，至文宗凡七世，而南郊親祀之

禮始克舉焉。壇壇地在麗正門外丙位，凡三百八畝有奇。壇三成，每成高八尺一寸，上成縱橫五丈，中成

十丈，下成十五丈。四陛午貫地子午卯酉四位，陛十有二級。外設二壇，內壇去壇二十五步，外壇去內壇

五十四步。壇各四門，外垣南樞星門三，東西樞星門各一。圍壇周圍上下俱護以甃。內外壇各高五尺，

壇四面各有門三，俱塗以赤。至大三年冬至，以三成不足以容從祀版位，以青繩代一成，繩二百，各長二

十五尺，以足四成之制。燎壇在外壇內丙巳之位，高一丈二尺，四方各一丈，周圍亦護以甃。東西南三出

陛，開上南出戶，上方尺六，深可容柴。香殿三間，在外壇南門之外，少西南向。饌幕殿五間，在外壇南門

之外，少東南向。省饌殿一間，在外壇東門之外，少北南向。外壇之東南爲別院，內神廚五間，南向，祠祭局三間，北向，酒庫三間，西向，獻官齋房六十間以翼之，皆北向。兩翼端皆有垣，以抵東西周垣，各爲門以便出入。齊班廳五間，在獻官齋房之前，西向，儀鸞局三間，法物庫三間，都監庫五間，在外垣之西北隅，皆西向，雅樂庫十間，在外垣西門之內，少南東向，演樂堂七間，在外垣內之西南隅，東向，獻官厨三間，在外垣內之東南隅，西向，滌養犧牲所在外垣南門之外，少東西向，內犧牲房三間，南向。成宗紀：大德九年七月辛亥，築郊壇於麗正文明門之南丙位。十一月庚午，祀昊天上帝於南郊。武宗紀：大德十一年九月乙丑，請諡皇考皇帝、大行皇帝於南郊。至大三年二月甲子，以上皇太后尊號告祀南郊。仁宗紀：至大四年四月戊申，以即位告天地於南郊。六月甲子，請大行皇帝諡於南郊。文宗紀：至順元年九月，勅有司繕治南郊齋宮。順帝紀：至正三年十月己酉，親祀上帝於南郊，以太祖配。十五年十一月壬辰，親祀上帝於南郊。

社稷壇 世祖紀：至元二十九年七月壬申，建社稷和義門內。壇各方五丈，高五尺。白石爲主，飾以五色土。壇南植松一株。北墉瘞坎墮垣悉倣古制，別爲齋廡門廡三十三楹。祭祀志：至元七年十一月，

有詔歲祀太社太稷。三十年正月，始用御史中丞崔彥言，於和義門內少南得地四十畝爲壇垣，近南爲二壇。壇高五丈，方廣如之。社東稷西，相去約五丈。社壇土用青赤白黑四色，依方位築之。中間實以常土，上以黃土覆之。築必堅實，依方面以五色泥飾之。四面當中各設一陸道，其廣一丈，亦各依方色。稷壇一如社壇之制，惟土不用五色。其上四周純用一色黃土，壇皆北向。立北墉於社壇之北，以磚爲之，飾黃泥。瘞坎二於稷壇之北少西，深足容物。二壇周圍壇垣以磚爲之，高五丈，廣三十丈，四隅連飾。內壇

垣橋星門四所，外垣橋星門二所，每所門三，列戟二十有四。外壇內北垣下屋七間，南望二壇，以備風雨，曰望祀堂。堂東屋五間，連廡三間，曰齊班廳。廳之南，南向屋八間，曰獻官幕。又南，南向屋三間，曰院官齋所。又其南，屋十間，自北而南，曰祠祭局，曰儀鸞庫，曰法物庫，曰都監庫，曰雅樂庫。又其南，北向屋三間，曰百官廚。外垣南門西，墻垣西南，北向屋三間，曰大樂署。其西，東向屋三間，曰樂工房。又其北，北向屋一間，曰饌幕殿。又北，南向屋三間，曰饌幕。又北，稍東南，向門一間，院內，南向屋三間，曰神厨，東向屋三間，曰酒庫。近北，少却，東向屋三間，曰犧牲房。并有亭。望祀堂後，自西而東南，向屋九間，曰執事齋郎房。自北折而南，西向屋九間，曰監祭執事房。此壇壇次舍之所也。社主用白石，長五尺，廣二尺，剡其上如鐘。於社壇近南北，向埋其半於土中。稷不用主。后土氏配社，后稷氏配稷。神位版二，用栗，素質黑書。社樹以松，於社稷二壇之南，各一株。此作主樹木之法也。方技田忠良傳：至元二十四年，請建太社於朝右，建郊壇於國南。

先農壇、先蠶壇、世祖紀：至元七年六月丙申，立籍田大都東南郊。十六年二月戊寅朔，祀先農於籍田。祭祀志：先農之祀，始自至元九年二月，命祭先農如祭社之儀。十四年二月戊辰，祀先農東郊。十五年二月戊午，祀先農，以蒙古胄子代耕籍田。二十一年二月丁亥，又命翰林學士撒里蠻祀先農於籍田。武宗至大三年夏四月，從大司農請，建農蠶二壇，博士議二壇之式，與社稷同，縱廣一十步，高五尺，四出陛，外壇相去二十五步，每方有橋星門。今先農先蠶壇位在籍田內，若立外壇，恐妨千畝，其外壇勿築。是歲命祀先農如社稷禮。

風雨雷師壇 祭祀志：風雨雷師之祀，自至元七年十二月大司農請於立春後丑日祭風師於東北郊，立夏

後申日祭雷雨師於西南郊。延祐五年，乃即二郊定立壇壝之制。

五福太乙神壇時。成宗紀：大德元年正月，建五福太乙神壇時。

司天臺 祭祀志：日星始祭於司天臺，而回回司天臺遂以祭星爲職。世祖紀：至元五年十月，勅二分

二至及聖誕節日祭星於司天臺。十九年二月，修司天臺。成宗紀：至元三十一年五月祭太陽太歲火土

等星於司天臺。元貞元年十二月庚子朔，遣集賢院使阿里渾撒里等祭星於司天臺。大德九年八月己卯，

命太常卿丑閏，昭文館大學士靳德進祭星於司天臺。仁宗紀：至大四年四月癸卯，祭星於回回司天臺。

擅五星於司天臺。皇慶二年四月甲子，祭星於司天臺。五年五月戊辰，遣平章政事王毅祭星於司天臺七

月三晝夜。六年正月己卯，祭星於司天臺。二月丁亥朔，祭星於回回司天臺。九月壬辰，祭星於司天臺。

英宗紀：延祐七年八月，祭星於司天臺。十二月乙丑，祭星於回回司天臺四十晝夜。至治元年六月丁卯，

祭星於司天臺。泰定元年五月癸丑，命司天監祭星。十一月甲午，祭星於回回司天臺。二年三月丁酉，祭

星於回回司天臺。三年三月壬子，祭星於司天臺。四年四月，祭星於回回司天臺。文宗紀：致和元年

九月丁丑，命司天監祭星。辛巳，命司天監祭星。天曆二年五月己未，命司天監祭星。八月甲辰，命司天

監及回回司天監祭星。至順元年正月辛酉，命回回司天監祭星。十一月甲辰，命司天監祭星。

雲仙臺 成宗紀：至元三十一年五月庚申，祭紫微星於雲仙臺。

太廟 祭祀志：世祖中統四年三月癸卯，詔建太廟於燕京。至元元年十月，奉安神主於太廟。二年十月己

卯，享於太廟。三年九月，始作八室神主，設祔室。十月丁丑，太廟成。十一月戊申，奉安神主於祔室。

六年十二月己丑，命國師僧薦佛事於太廟七晝夜。八年八月，世祖紀作十五年六月丁丑。太廟柱朽，從張易言，告於列室

而後修。奉遷粟主金牌位與舊神主於饌幕殿，工畢安奉。自是修廟皆如之。十四年八月乙丑，詔建太廟。十七年十二月甲申，告遷於太廟。癸巳，承旨和禮霍孫、太常卿太出禿忽思等以祔室內粟主八位并日月山板位、聖安寺木主俱遷。甲午，和禮霍孫、太常卿撒里蠻率百官奉太祖、睿宗二室金主於新廟安奉，遂大享焉。乙未，毀舊廟。二十一年三月丁卯，太廟正殿成，奉安神主。英宗以四時躬祀太廟。至治

元年正月乙酉，始命於太廟垣西北建大次殿。五月，中書省臣言：世祖所建太廟，前廟後寢，往歲寢殿災，請以今殿爲寢，別作前廟十五間，中三間通爲一室以奉太祖神主，餘以次爲室。制曰善。十二月，作太

廟正殿。三年七月辛卯，太廟成。

本紀皆同。又秦定帝紀云：泰定元年五月辛巳，太廟新殿成。戊戌，遷列聖神主於太廟新殿。蓋至治三年太廟已成，尙未遷主，而英宗遇弒，重加修飾，至是告成而遷主也。

祭

祀志：廟制：至元十七年，新作於大都，前廟後寢。正殿東西七間，南北五間，內分七室。殿陛二成三階，中

曰泰階，西曰西階，東曰阼階。寢殿東西五間，南北三間，環以宮城，四隅重屋，號角樓。正南、正東、正西

宮門三門各五門，皆號神門。殿下道直東西神門曰橫街，直南門曰通街，甃之。通街兩旁井二，皆覆以

亭。宮城外緣以崇垣。饌幕殿七間，在宮城南門之東，南向。齊班廳五間，在宮城之東南，西向。省饌殿

一間，在東城東門少北，南向。初獻齋室在宮城之東，東垣門內少北，西向，其南爲亞終獻。司徒大禮使助

奠七祀獻官等齋室皆西向。雅樂庫在宮城西南，東向。法物庫、儀鸞庫在宮城之東北，皆南向。都監局

在其東少南，西向。東垣之內環築牆垣爲別院，內神厨局五間在北，南向。井在神厨之東北，有亭。酒庫

三間在井亭南，西向。祠祭局三間，對神厨局，北向，院門西向。百官厨五間，在神厨院南，西向。宮城之

南復爲門，與中神門相值，左右連屋六十餘間，東掩齊班廳，西值雅樂庫，爲諸執事齋房。築崇甬以環其

外。東西南開樞星門三，門外馳道抵齊化門之通衢。至治元年，詔議增廣廟制。三年，別建大殿一十五

間於今廟前，用今廟爲寢殿，中三間通爲一室，餘十間各爲一室，東西兩旁際牆各留一間以爲夾室，室皆東西橫闊二丈，南北入深六間，每間二丈。宮城南展後，鑿新井二於殿南，作亭。東南隅西南隅角樓，南神門、東西神門、饌幕殿、省饌殿、獻官百執事齋室、中南門、齊班廳、雅樂庫、神厨、祠祭等局皆南徙。建大次殿三間於宮城之西北。東西樞星門亦南徙。東西樞星門之內，鹵簿房四所，通五十間。齊履謙

傳：至大二年，太常請修社稷壇及浚太廟庭中井，或以歲君所直，欲止其役。履謙曰：國家以四海爲家，歲君豈專在是？方技田忠良傳：少府爲諸王昌童建宅於太廟南，忠良往仆其柱。少府奏之。帝問忠良，

對曰：太廟前豈諸王建宅所耶？帝曰：卿言是也。又奏曰：太廟前無馳道，非禮也。即勅中書關道。

綵殿 英宗紀：延祐七年四月戊辰，議附仁宗，以陰陽拘忌，權結綵殿於太室東南以奉神主。 祭祀志：

延祐七年，仁宗升祔，增置廟室。太常禮廟院下博士檢討歷代典故，移書禮部、中書，集議曰：古者天子祭七代，兄弟同爲一代，廟室皆有神主，增置廟室。又議：大行皇帝升祔，太廟七室皆有神主，增室不及，依前代典故，權於廟內，止設幄坐，面南安奉。今相視得第七室近南對室地位，東西一丈五尺，除設幄座外，餘五尺，不妨行禮。乃結綵爲殿，置武宗室南，權奉神主。 曹元用傳：初，太廟九室合饗於一殿，仁宗崩，

無室可祔，乃於武宗室前結綵爲次。英宗在上京，召禮官集議。元用言：古者宗廟有寢有室，宜以今室爲寢，更營大殿於前，爲十五室。帝嘉其議。

神御殿 祭祀志：神御殿舊稱影堂，所奉祖宗御容皆紋綺局織錦爲之。影堂所在，世祖帝后大聖壽萬安寺，裕宗帝后亦在焉。順宗帝后大普慶寺，仁宗帝后亦在焉。成宗帝后大天壽萬寧寺。武宗及二后大崇恩福元寺，爲東西二殿。明宗帝后大天源延聖寺，英宗帝后大永福寺，也可皇后大護國仁王寺。

又見各寺條下。

祖、武宗影堂皆藏玉册十有二牒，玉寶一鈕。仁宗影堂藏皇太子玉册十有二牒，皇后玉册十有二牒，玉寶一鈕。英宗影堂藏皇帝玉册十有二牒，玉寶一鈕，皇太子玉册十有二牒。凡帝后册寶，以匣匱金鎖鑰藏於太廟，此其分置者。其祭器則黃金瓶、畢盤、盃之屬以十數，黃金塗銀香合、椀、櫛之屬以百數，銀壺、盃、盃、匱之屬稱是。玉器、水晶、瑪瑙之器爲數不同，有玻璃瓶、琥珀勺。世祖影堂有眞珠簾。又皆有珊瑚樹、碧甸子山之屬。泰定二年，亦作顯宗影堂於大天源延聖寺，天曆元年廢，舊有崇福、殊祥二院，奉影堂祀事，乃改爲泰禋院。二年，又改爲太禋宗禋院，秩二品。旣而復以祖宗所御殿尙稱影堂，更號神御殿。文宗紀，二年三月癸巳。殿皆製名以冠之。世祖曰元壽，昭睿順聖皇后曰睿壽，南必皇后曰懿壽，裕宗曰明壽，成宗曰廣壽，順宗曰衍壽，武宗曰仁壽，文獻昭聖皇后曰昭壽，仁宗曰文壽，英宗曰宣壽，明宗曰景壽。泰定帝紀：泰定元年九月丙申，葺太祖神御殿。案太祖神御殿史不言其所在，惟翰林院有太祖、太宗、睿宗御容，至治三年遷普慶寺。此云葺太祖神御殿，未詳。十月戊午，立壽福總管府，典累朝神御殿祭祀及錢穀事。致和元年六月丙子，遣使祀世祖神御殿。揭傒斯傳：撰明宗神御殿碑文。曹元用傳：太禋宗禋院副使缺，中書奏以元用爲之，帝不允。李尤魯神傳：會立太禋院，除僉太禋宗禋院兼祇承神御殿事。方技阿尼哥傳：凡兩京寺觀之像多出其手，原廟列聖御容織錦爲之，圖畫弗及也。

宮城 世祖紀：至元四年十月戊戌，宮城成。八年二月丁酉，發中都、眞定、順天、河間、平澤民二萬八千餘人築宮城。九年五月乙酉，宮城初建東西華，左右掖門。十九年二月，修宮城太廟司天臺。二十八年二月丁亥，建宮城南面廬，以居宿衛之士。

崇天門 泰定帝紀：泰定三年二月乙未，修佛事，厭雷於崇天門。禮樂志：皇太子出閣，侍儀使前導，由

崇天門入升大明殿。 祭祀志：祀前一日所司備儀從內外仗，侍祠官兩行序立於崇天門外，太僕寺控御馬立於大明門外。 駕入崇天門，至大明門外降馬升輿。 徹里帖木兒傳：翌日崇天門宣詔，特令有壬爲班首以折辱之。

大明門見上 禮樂志：上尊號受朝賀儀：前期二日，儀鸞司設大次於大明門外。

日精門、月華門 禮樂志：元正受朝儀：尙引殿前班皆公服，分左右入日精、月華門，就起居位。 管旗分立大明門南楹，典引引丞相以下皆公服，入日精、月華門，就起居位。 四品以上賜酒殿上，典引引五品以下賜酒於日精、月華二門之下。 册立皇后儀：前期二日，儀鸞司設發册寶案於大明殿。 捧册官由月華門入，捧寶官由日精門入。

光天門 禮樂志：國史院進先朝實錄儀：是日大昕，諸司官具公服立於光天門外，持儀使引實錄案以入，監修國史以下奉隨至光天殿前分班立。

延春門 李孟傳：共扶仁宗上馬，孟及諸臣皆步從，入自延春門。

鳳儀門 禮樂志：皇太子妃，前導自鳳儀門入。

厚載門 世祖紀：至元二十七年，命帝師西僧遞作佛事，坐靜於萬壽山，厚載門、茶罕腦兒、聖壽萬安寺、桓州南屏庵、雙泉等所，凡七十二會。

兵志：成宗元貞二年十月，樞密院臣言：昔大朝會時，皇城外皆無牆垣，故用軍環繞以備圍宿。 今牆垣已成，南北西三畔皆可置軍，獨御酒庫西地窄不能容。 臣等與丞相完澤議：各城門以蒙古軍列衛，及於周橋，南置戍樓以警昏旦。 從之。 英宗至治元年八月，東內皇城建宿衛屋二十五楹，命五衛內摘軍二百

五十人居之以備禁衛。趙孟頫傳：他日行東御膳外，道險，孟頫馬跌墮於河。桑哥聞之，言於帝，移築御膳稍西二丈許。

大明殿 世祖紀：至元十年十月，初建正殿寢殿香閣周廡兩翼室。十一年正月己卯朔，宮闕告成。帝始御正殿，受皇太子諸王百官朝賀。十一月，起閣南直大殿及東西殿。十八年二月戊辰，發侍衛軍四千完正殿。二十一年正月乙卯，帝御大明殿。右丞相和禮霍孫率百官奉玉冊玉寶上尊號，諸王百官朝賀如朔旦儀。武宗紀：大德十一年十一月十一日己卯，以皇太子受冊禮成，帝御大明殿，受諸王百官朝賀。延祐七年正月癸未，帝御大明殿，受諸王百官朝賀。英宗紀：延祐七年三月庚寅，即皇帝位於大明殿。十一月辛巳，以親祀太廟禮成，御大明殿，受朝賀。十二月丙辰，以太皇太后加號禮成，御大明殿，受朝賀。至治元年三月丁丑，御大明殿，受緬國使者朝貢。十一月戊寅，御大明殿，羣臣上尊號。泰定帝紀：至治三年十月癸亥，修佛事於大明殿。十一月丁未，御大明殿，受諸王百官朝賀。泰定元年三月丙午，御大明殿，冊八八罕氏爲皇后，皇子阿速吉八爲皇太子。四年七月，修大明殿。文宗紀：致和元年八月壬申，即位於大明殿，受諸王百官朝賀。十一月丁丑，御大明殿，受諸王文武百官朝賀。十二月丙子，分命諸僧於大明殿，延春閣，興聖宮，隆福宮，萬歲山作佛事。天曆二年二月辛卯，帝御大明殿，冊命皇后雍吉刺氏。九月乙卯朔，作佛事於大明殿興聖隆福諸宮。癸酉，帝御大明殿，受諸王百官朝賀。至順元年五月戊午，帝御大明殿，燕鐵木兒率文武百官奉玉冊玉寶上尊號。九月丙子，命西僧作佛事於大明殿。十月戊午，致齋於大明殿。十二月戊午，以郊祀禮成，帝御大明殿，受文武百官朝賀。寧宗紀：至順三年十月庚子，帝即位於大明殿。十一月己卯，帝御大明殿，受朝賀。順帝紀：元統六年十一月乙

卯，以親裸大禮慶成，御大明殿，受羣臣朝。禮樂志：皇帝即位受朝儀：皇帝升大明殿。上尊號受朝賀。

儀：皇帝升大明殿。博爾忽傳：至大四年，月赤察兒入朝，帝宴於大明殿，眷禮優渥。高興傳：至元十

六年，入朝侍燕大明殿，悉獻江南所得珍寶。張珪傳：仁宗將即位，廷臣用太皇太后旨，行大禮於隆福宮，

法駕已陳矣。珪言當御大明殿。帝悟，移仗大明。

玉德殿 成宗紀：大德十一年正月癸酉，帝崩於玉德殿。武宗紀：至大四年正月庚辰，帝崩於玉德殿。

英宗紀：延祐七年十二月庚戌，鑄銅爲佛像，置玉德殿。伯顏傳：帝御玉德殿。夜二鼓，遣太子怯薛月

可察兒率三十騎抵太子營，取之入城。脫脫傳：奉帝御玉德殿，召近臣汪家奴、沙刺班及省院大臣，先

後入見，出五門聽命。李孟傳：入見武宗於玉德殿。

文德殿 英宗紀：延祐七年十月壬子，作佛事於文德殿四十日。疑是上都。至治元年正月丁丑，修佛事於文德

殿。

寶慈殿 英宗紀：延祐七年三月甲午，作佛事於寶慈殿。文宗紀：天曆元年十二月，命高昌僧作佛事於

寶慈殿。

慈福殿 王結傳：中宮命僧尼於慈福殿作佛事，已而殿災。結言：僧尼褻瀆，當坐罪。

光天殿 英宗紀：延祐七年十一月丁亥，作佛事於光天殿。泰定帝紀：泰定元年正月壬寅，命僧諷西

番經於光天殿。順帝紀：至正七年三月，修光天殿。王約傳：仁宗正位宸極，欲用陰陽家言，即位光

天殿，即東宮也。約言於太保曲樞曰：正名定分，當御大內。太保入奏，遂即位於大明殿。

壽昌殿 泰定帝紀：泰定元年四月癸亥，修佛事於壽昌殿。

興聖殿 泰定帝紀：致和元年三月乙卯，帝御興聖殿，受無量壽佛戒於帝師。 文宗紀：天曆元年十月丙

申，燕鐵木兒入朝，賜燕興聖殿。燕鐵木兒傳同。 庚戌，帝御興聖殿，齊王月魯帖木兒等奉上皇帝寶。二年十月甲

辰，畏兀僧百八人作佛事於興聖殿。

仁智殿 文宗紀：至順元年四月壬午朔，命西僧作佛事於仁智殿，自是日始，至十二月終罷。

明仁殿 順帝紀：至正元年九月壬寅，許有壬進講明仁殿。帝悅，賜酒宣文閣中，仍賜貂裘金織文幣。

聖安殿 順帝紀：至正十三年九月己丑，建皇太子鹿頂殿於聖安殿西。

宸德殿 順帝紀：至正十四年四月，皇太子徙居宸德殿，命有司修葺之。

清寧殿 順帝紀：至正二十二年，皇太子常坐清寧殿，分布長席，列坐西番高麗諸僧。

又見健德門下。

嘉禧殿 月魯不花傳：拜江南行御史臺中丞。陛辭之日，帝御嘉禧殿慰勞之。

披香殿 葉李傳：召見披香殿，勞問：卿遠來良苦。

大殿、寢殿 世祖紀：至元二十四年，命西僧監藏宛卜思哥等作佛事坐靜於大殿、寢殿、萬壽山、五臺

山等寺，凡三十三會。二十五年，作佛事坐靜於玉塔殿、寢殿、萬壽山、護國仁王等寺，凡五十四會。

玉塔殿 世祖紀：至元二十二年，命西僧遞作佛事於萬壽山、玉塔殿、萬安寺，凡三十會。

紫檀殿 世祖紀：至元二十八年三月，發侍衛兵營紫檀殿。三十一年正月癸酉，帝崩於紫檀殿。 英宗

紀：至治二年閏月壬子，作紫檀殿。

香殿 武宗紀：至大元年八月甲寅，李邦寧以建香殿成，賜金五十兩，銀四百五十兩。 英宗紀：至治元

年三月乙酉，寶集寺金書西番波八若經成，置大內香殿。 楊恭懿傳：至元十二年正月二日，帝御香殿，

以大軍南征使久不至，命筮之。
張立道傳：安南拒命，帝召立道至香殿諭之。
盧世榮傳：至元二十二

年正月壬午，世祖御香殿，氈殿。
順帝紀：至正十三年十月，撤世祖所立氈殿，改建殿宇。

鹿頂殿 仁宗紀：皇慶五年二月，建鹿頂殿於文德殿後。
英宗紀：至治二年八月戊寅，詔畫蠶麥圖於鹿

頂殿壁，以時觀之。
疑是上都之鹿頂殿。
泰定帝紀：泰定二年十二月丁亥，修鹿頂殿。三年八月，鹿頂殿成。十二月

癸巳，作鹿頂殿。
順帝紀：至正三年三月壬申，造鹿頂殿。
英宗紀：至治元年四月己未，造象駕金脊

殿。

楠木殿 泰定帝紀：泰定元年七月，作楠木殿。

棕殿、棕毛殿 泰定帝紀：泰定元年十二月辛未，作新棕殿成。二年閏月癸酉，作棕毛殿。
順帝紀：元

統元年十一月辛丑，起棕毛殿、金帳殿。
禮樂志：布綿蕙金帳殿前，帝及皇后臨觀於露階。

中宮金脊殿 泰定帝紀：泰定元年八月庚午，作中宮金脊殿。

東宮香殿 裕宗傳：東宮香殿成，工請鑿石爲池，如曲水流觴故事。太子曰：古有肉林酒池，爾欲吾效之

耶？不許。

皇太子鹿頂殿見聖安殿下

瓊華島 世祖紀：中統四年三月庚子，亦迭黑兒丁請修瓊華島，不從。至元元年十二月壬子，修瓊華島。

八年五月己巳，修佛事於瓊華島。

廣寒殿 世祖紀：至元二年十二月己丑，瀆山大玉海成，勅置廣寒殿。三年四月丁卯，五山珍御榻成，置

瓊華島廣寒殿。四年九月壬辰，作玉殿於廣寒殿中。十年三月丙寅，帝御廣寒殿，遣攝太尉中書右丞相

安童授皇后弘吉刺氏玉册玉寶，遣攝太尉同知樞密院事伯顏授皇太子眞金玉册金寶。

文宗紀：天曆二

年十月，作佛事於廣寒殿。

大明一統志：西苑在皇城內，中有太液池，環華島，池周圍深廣，波光澄澈，綠荷芳藻，含香吐秀，游魚浮鳥，競戲羣集。島皆奇石，巖岩磊磊，下瞰池水。上有廣寒殿，棟宇聳飛，金碧交映，複閣危榭，左右拱

向，喬松古檜，烟雲繚繞，隱然蓬萊仙府。

太液池 釋老丘處機傳：浴於東溪，越二日，天大雷雨，太液池岸北水入東湖，聲聞數里，魚鼈盡去，池遂

涸，而北口高岸亦崩。處機歎曰：山其摧乎！池其涸乎！吾將與之俱乎！遂卒。

萬壽山殿 世祖紀：至元二十一年二月，立法輪竿於大內萬壽山，高百尺。英宗紀：延祐七年六月甲

寅，修佛事於萬壽山。又見厚載門下。禮樂志：劉秉忠搜訪舊教坊樂工，依律運譜，被諸樂歌，六月而成，音聲

克諧。陳於萬壽山便殿。兵志：至元十四年五月，以蒙古軍與漢軍相參，備都城內外及萬壽山宿衛，仍

以也速不花領圍宿事。

張珪傳：侍宴萬壽山，賜以玉帶。案：史以泰定以後皆作萬歲山，疑無兩地。今厚載門內有萬歲山。

萬歲山殿 泰定帝紀：泰定二年六月己卯朔，蒼萬歲山殿。四年十二月乙卯，植萬歲山花木八百七十

本。文宗紀：至順二年七月，命西僧於大都萬歲山憫忠閣作佛事，起八月八日，至車駕還大都日止。

禿刺傳：大宴萬歲山，禿刺醉，起解其腰帶擲諸地，瞋目謂帝曰：爾與我者止此爾！吳元珪傳：從幸上

都，受命取御藥於大都萬歲山。

大明一統志：西苑東北有萬歲山，高聳明秀，蜿蜒秀薄，上插霄漢，隱映宮闕，今俗呼爲煤山。

大明宮 仁宗紀：皇慶元年三月庚申，勅簡汰大明宮，興聖宮宿衛。泰定帝紀：泰定三年九月辛亥，帝

師還京，修灑淨佛事於大明、興聖、隆福三宮。

壽寧宮 成宗紀：至元三十一年五月壬子，始開醮祠於壽寧宮。九年九月戊申，聖誕節，帝駐蹕於壽寧

宮，受朝賀。

隆福宮 成宗紀：至元三十一年七月庚申，改侍衛都指揮使司爲隆福宮左都威衛使、右都威衛使。十一月丁未朔，帝朝皇太后於隆福宮，上玉冊玉寶。 武宗紀：大德十一年十一月丙寅，帝朝隆福宮，上皇太后玉冊玉寶。

英宗紀：延祐七年十一月戊子，幸隆福宮。 鄭滌孫傳：隆福宮以其兄弟前朝士，乃製衣親賜，人以爲異遇焉。

卜天璋傳：入覲，賜酒隆福宮及錦衣三襲。

興聖宮 武宗紀：至大元年三月丁卯，建興聖宮。 二年五月丁亥，以通政院使憨刺合兒知樞密院事，董建

興聖宮。 三年十月戊申，帝率皇太子諸王羣臣朝興聖宮，上皇太后尊號冊寶。 英宗紀：延祐七年三月

壬辰，太皇太后受百官朝賀於興聖宮。 明宗紀：泰定皇帝崩於上都，時僉樞密院事燕鐵木兒留守京師。

八月甲午，黎明，召百官集興聖宮。 文宗紀：至順元年十二月丁卯，命西僧於興聖光天宮十六所作佛

事。 二年十月辛酉，命西僧作佛事於興聖宮，十有五日乃罷。 順帝紀：至正七年二月甲戌朔，興聖宮作

佛事。 后妃傳：順帝完者忽都皇后居興聖宮。 燕鐵木兒傳：爲建第於興聖宮之西南。 劉德溫傳：

監建興聖宮。 宦者朴不花傳：皇后奇氏微時與不花同鄉里，及選爲宮人有寵，遂爲第二皇后，居興聖

宮。 生皇太子愛猷識理達臘。

光天宮 仁宗紀：延祐七年正月辛丑，帝崩於光天宮。

拱辰堂 順帝紀：至正元年九月壬午，賜文臣燕於拱辰堂。

端本堂 順帝紀：至正九年十月丁酉，命皇太子愛猷識理達臘自是日爲始，入端本堂肄業。 命脫脫領端

本堂事，司徒雅普化知端本堂事。 端本堂虛中座以俟至尊臨幸，太子與師傅分東西向坐授書，其下僚屬

以次列坐。 脫脫、李好 李好文傳：命好文以翰林學士兼諭德，取史傳及先儒論說有關治體而協經旨者，

文傳並同。

加以所見，做真德秀大學衍義之例，爲書十一卷，名曰端本堂經訓要義，奉表以進。詔付端本堂，令太子習焉。

奎章閣 百官志：奎章閣，天曆二年立於興聖殿西，命儒臣進經史之書，考帝王之治。文宗紀：至順三

年五月，撒迪請備錄皇上登極以來固讓大凡，往復奏答，其餘訓勅辭命及燕鐵木兒等宜力效忠之蹟，命朶來續爲蒙古脫不赤顏一書，置之奎章閣。從之。李朶魯獅傳：文宗親祀天地社稷宗廟，獅爲禮儀使，竣

事，上天曆大慶詩三章。帝命藏之奎章閣。呂思誠傳：文宗在奎章閣，有旨取國史閱之，左右昇匱以

往。院長貳無敢言。思誠在末僚，獨跪閣下爭曰：國史紀當代人君善惡，自古天子無觀閱之者。事遂

寢。謝端傳：文宗建奎章閣，蒐羅中外才俊置其中。李洞傳 瞻思傳：天曆三年，召入爲應奉翰林文字，

召對奎章閣。

宣文閣 順帝紀：至正元年六月戊辰，改舊奎章閣爲宣文閣。十四年十二月甲辰，以桑哥失里提調宣文

閣。阿魯圖傳：帝御宣文閣。月魯不花傳：爲大都路達魯花赤，入見帝宣文閣。周伯琦傳：至正元

年，改奎章閣爲宣文閣，藝文監爲崇文監。伯琦爲宣文閣授經郎，敎戚里大臣子弟。每進講，輒稱旨。且

日被顧問。以伯琦工書法，命篆宣文閣寶，仍題扁宣文閣，及摹王羲之所書蘭亭序，智永所書千文，刻石

閣中。自是累轉官皆宣文崇文之間，而眷遇益隆矣。又見健德門下。

延春閣 成宗紀：元貞元年二月，以醮延春閣，賜天師張與棣、宗師張留孫、真人張志僊等十三人玉圭各

一。製寶玉五方佛冠賜帝師。武宗紀：大德十一年十二月，命留守司以來歲十五日起燈山於大明殿後

延春閣前。英宗紀：延祐七年十二月辛酉，作延春閣後殿。丙寅，修秘密佛事於延春閣。泰定帝紀：

至治三年十二月，塑馬哈吃刺佛像於延春閣之徽清亭。泰定元年十月丙子，命帝師作佛事於延春閣。

文宗紀：天曆元年九月戊寅，命高昌僧作佛事於延春閣。

又見健德門下。

寬徹普化傳：孛羅帖木兒入奏事，行至

延春閣李樹下，伯顏達兒自衆中奮出，斫孛羅帖木兒，中其腦，上都馬等競前斫死之。

孛羅帖木兒傳同。

答里麻

傳：帝宴大臣於延春閣，特賜答里麻白鷹以表其貞廉。

歐陽玄傳：至正十七年時將大赦天下，宣赴內

府。玄久病不能步履，丞相傳旨肩輿至延春閣下。

延華閣 泰定帝紀：泰定二年三月己亥，命西僧作燒壇佛事於延華閣。

徽猷閣 文宗紀：天曆元年十二月，西僧百人作佛事於徽猷閣七日。

凝暉閣 文宗紀：天曆二年十二月辛卯，命帝師率其徒作佛事於凝暉閣。

大安閣 順帝紀：元統二年七月壬辰，帝幸大安閣。是日宴侍臣於奎章閣。

宦者李邦寧傳：武宗嘗奉

皇太后燕大安閣。閣中有故篋，問邦寧曰：此何篋也？對曰：此世祖貯裘帶者。臣聞有聖訓曰：藏此以遺

子孫，使見吾朴儉，可爲華侈之戒。帝命發篋視之，歎曰：非卿言朕安知之！

穆清閣 順帝紀：至正十三年正月甲戌，重建穆清閣。十四年九月，賜穆清閣工匠皮衣各一領，蓋海青鷹

房。

香閣 禮樂志：至元十六年十月，大樂令完顏椿等以樂工見於香閣。

憫忠閣 見萬歲山殿下

棕毛鹿頂樓 泰定帝紀：泰定三年十一月己酉，作鹿頂棕樓。四年四月甲戌，作棕毛鹿頂樓。

楠木亭 順帝紀：元統二年七月，帝幸楠木亭。

涼亭 百官志：尙供總管府掌守護東涼亭行宮及游獵供需之事。 禿刺傳：武宗幸涼亭，將御舟，禿刺前止之。

東華射圃 順帝紀：至正七年十月辛卯，開東華射圃。

興和新內 文宗紀：天曆元年十一月辛未，遣西僧作佛事於興和新內。

蒲萄酒室、女工室 世祖紀：至元二十八年五月，宮城中建蒲萄酒室及女工室。

儀鸞局 世祖紀：至元十一年二月，初立儀鸞局，掌宮門管鑰，供帳燈燭。

長秋寺 仁宗紀：皇慶二年七月庚子，立長秋寺，掌武宗皇后宮政。

寧徽寺 文宗紀：天曆二年八月辛丑，立寧徽寺，掌明宗宮分事。 哈麻傳：監察御史幹勒海壽劾哈麻恃

以提調寧徽寺爲名，出入脫忽思皇后宮闈。寧徽寺者，掌脫忽思皇后錢糧，而脫忽思皇后帝庶母也。

中書省 世祖紀：至元九年二月庚子，建中書省署於大都。

尙書省 桑哥傳：至元二十四年二月，復置尙書省。

國子監 世祖紀：至元六年七月癸酉，立國子監。二十四年閏二月辛未，設國子監。 仁宗紀：皇慶元年

二月丁卯朔，徙大都路學所置周宣王石鼓於國子監。二年六月甲申，建崇文閣於國子監。 順帝紀：至

正二十年十月甲申朔，甘露降於國子監大成殿前柏木。

回回國子監 仁宗紀：延祐元年四月，立回回國子監。 英宗紀：延祐七年四月乙卯，罷回回國子監。

蒙古國子監 順帝紀：至正十五年六月癸未，中書參知政事實理門言：舊立蒙古國子監，專教四怯薛并各

愛馬官員子弟，今宜諭之，依先例入學，俾嚴爲訓誨。從之。

大都路學 王楫傳：時都城廟學既燬於兵，楫取舊樞密院地復創立之。春秋率諸生行釋菜禮，仍取舊岐陽石鼓列廡下。
尙野傳：至大元年，除國子司業，近臣奏分國學西序爲大都路學，帝已可其奏。野謂國

學府學混居不合禮制，事遂寢。
案：前立大都路學，此又云奏分國學西序，未詳。

秘書監 世祖紀：至元十年正月丁卯，立秘書監。

集賢院 世祖紀：至元二十二年十二月乙酉，立集賢院。

太史局 齊履謙傳：至元十六年，初立太史局。

渾天儀 世祖紀：至元三年五月辛丑，以黃金飾渾天儀。

蓮花寶山等漏 齊履謙傳：都城刻漏舊以木爲之，其形如碑，故名碑漏。內設曲筩，鑄銅爲丸，自碑首轉行而下，鳴鑿以爲節。其漏經久廢壞，晨昏失度。大德元年，中書俾履謙視之，因見刻漏旁有宋舊銅壺

四，於是按圖考定蓮花寶山等漏制，命工改作。又請重建鼓樓，增制更鼓，並守漏卒，當時遵用之。

會同館 世祖紀：至元九年十月，初立會同館。
安南傳：留其使鄧國瓚於會同館。

習樂堂 世祖紀：至元四年三月乙未，勅中都路建習樂堂，使樂工肄業其中。

大樂署 世祖紀：至元十六年十月乙酉，帝御香閣，命大樂署令完顏椿等肄文武樂。

光祿寺 世祖紀：至元十五年十一月甲寅，幸光祿寺。

御酒庫 見宮城下

御藥院 世祖紀：至元十年九月丙午，置御藥院。

廣惠司 世祖紀：至元十年正月戊午，改回回愛薛所立京師醫藥院名廣惠司。

仁虞院 武宗紀：至大元年二月癸巳，立鷹坊爲仁虞院。 仁宗紀：至大四年二月，罷仁虞院，改置鷹坊。

總管府

拱衛司 劉正傳：械繫正於拱衛司。

大都路總管府 世祖紀：至元二十一年四月，立大都留守司兼少府監，立大都路總管府。 崔彥傳：至元

二十年，上疏言大都非如上都，止備巡幸，不應立留守司。此皆阿合馬以此位置私黨，今宜易置總管府。

兵馬司 兵志：京師有南北兩城兵馬司。

右警巡院 左警巡院 地理志：初設警巡院三。至元四年省其一，止設左右二院，分領坊市民事。

倉 世祖紀：至元五年八月庚子，勅京師瀕河立十倉。 兵志：世祖至元二十五年十一月，以軍守都城外

倉。初大都城內倉敖有軍守之，城外豐閭、豐實、廣貯、通濟四倉無守者。至是收糧頗多，丞相桑哥以爲

言。乃依都城內倉例，每倉發軍五人守之。十二月，中書省臣言：樞密院公廡後有倉貯糧，乞調軍五人看

守。從之。

萬億庫 桑哥傳：萬億庫有舊牌條七千餘條。

密場 百官志：大都四密場領匠夫三百餘戶，營造素白琉璃磚瓦。 南密場 西密場 琉璃局

凡山採木提舉司 百官志。

凡山宛平等處管夫匠所 百官志。

養種園 百官志：養種園提領二員，掌西山淘煤，羊山燒造黑白木炭，以供修建之用。

武成王廟 祭祀志：武成王立廟於樞密院公堂之西，以孫武子、張良、管仲、樂毅、諸葛亮以下十人從祀。

每歲春秋仲月上戊，樞密院遣官行禮。

東嶽廟 方技劉元傳：大都南城作東嶽廟，元爲造仁聖帝像，巍巍然有帝王之度。其侍臣像乃若憂深思遠者。始元欲作侍臣像，久之未措手。適閱秘書圖畫，見唐魏徵像，矍然曰：得之矣，非若此莫稱爲相臣者。遽走廟中爲之，即日成。士大夫觀者咸歎異焉。

大聖壽萬安寺 世祖紀：至元九年，建大聖壽萬安寺。紀於十六年又云建聖壽萬安寺於京城，當是重出。十六年，帝師亦憐吉卒。勅諸

國教師禪師百有八人即大都萬安寺設齋，圓戒，賜衣。二十五年四月甲戌，萬安寺成。佛像及窗壁皆金飾之。凡費金五百四十兩有奇，水銀二百四十斤。二十六年十二月癸卯，幸大聖壽萬安寺，置旃檀佛像。命帝師及西僧作佛事，坐靜二十會。成宗紀：元貞元年正月壬戌，以國忌即大聖壽萬安寺飯僧七萬。武

宗紀：大德十一年十二月辛丑，幸大聖壽萬安寺。英宗紀：至治元年七月己亥，奉仁宗及帝御容於大聖壽萬安寺。三年四月，勅京師萬安、慶壽、聖安、普慶四寺，作水陸佛事七晝夜。文宗紀：天曆元年十月己亥，幸大聖壽萬安寺，謁世祖、裕宗神御殿。二年五月乙亥，幸大聖壽萬安寺，作佛事於世祖神御殿。

五行志：順帝至正二十八年六月甲寅，大都大聖壽萬安寺災。是日未時，雷雨中有火自空而下。其殿脊東鯨魚口火焰出，佛身上亦火起。帝聞之泣下，亟命百官救護。唯東西二影堂神主及寶玩器物得免，餘皆焚燬。此寺舊名白塔，自成祖以來爲百官習儀之所。其殿陞闌楯一如內庭之制。成宗時置世祖影堂

於殿之西，裕宗影堂於殿之東，月遣大臣設祭。順帝紀禮樂志：元正受朝儀：前期三日習儀於聖壽萬安

寺或大興教寺。皇帝即位受朝儀：前期三日習儀於萬安寺。

大護國仁王寺 世祖紀：至元十一年三月，建大護國仁王寺成。十六年八月甲辰，置大護國仁王寺總管

府。二十二年正月辛卯，發諸衛軍六千八百人給護國寺修造。成宗紀：大德五年正月，奉安昭睿聖皇

后御容於護國仁王寺。英宗紀：延祐七年十月乙丑，幸大護國仁王寺。至治元年十一月己亥，幸大護

國仁王寺。

又見玉泉河下。

大天壽萬寧寺。成宗紀：大德九年二月乙未，建大天壽萬寧寺。泰定帝紀：泰定四年五月乙巳，作成宗

神御殿於天壽萬寧寺。后妃傳：成宗卜魯罕皇后，京師勦建萬寧寺，中塑秘密佛像，其形醜怪。后以手

帕蒙覆其面，尋傳旨毀之。

大崇恩福元寺。仁宗紀：至大四年十月己巳，勅繪武宗御容，奉安大崇恩福元寺。皇慶元年四月庚寅，

大崇恩福元寺成。文宗紀：天曆元年十二月丙子，幸大崇恩福元寺，謁武宗神御殿。二年正月丙寅，幸

大崇恩福元寺。十二月甲辰，命高麗漢僧三百四十人預誦佛經二藏於大崇恩福元寺。兵志：仁宗延祐

元年閏三月，隆禧院官言：初世祖影殿有軍士守之，今武宗御容於大崇恩福元寺安置，宜依例調軍守備。

從之。

大承華普慶寺。仁宗紀：至大四年十月辛未，賜大普慶寺金千兩，銀五千兩，鈔萬錠，西錦綵緞紗羅布帛

萬端，田八萬畝，邸舍四百間。皇慶二年七月辛酉，賜普慶寺益都田百七十頃。英宗紀：至治元年二月

己酉，作仁宗神御殿於普慶寺。泰定帝紀：泰定元年四月庚申，作昭聖皇后御容殿於普慶寺。八月辛

亥，遣翰林學士承旨降赤祀太祖、太宗、睿宗御容於普慶寺。二年十一月丁巳，幸大承華普慶寺。三年十

二月己亥，置大承華普慶寺總管府。四年二月甲戌，祭太祖、太宗、睿宗御容於大承華普慶寺。文宗紀：

天曆二年二月丙申，命中書省翰林國史院官祀太祖、太宗、睿宗御容於普慶寺。至順元年七月丁巳，命中

書省翰林國史院官祀太祖、太宗、睿宗御容於大普慶寺。 祭祀志：太祖、太宗、睿宗御容舊在翰林院，院

官春秋致祭。至治三年，遷至普慶寺，祀禮廢。泰定二年八月，中書省臣言當祭如故。乃命承旨翰赤齋香酒至大都，同省臣祭於寺。四年，造影堂於石佛寺，未及遷。至順元年七月，即普慶寺祭如故事。二年，復祀於翰林國史院。重改至元之六年，翰林院言：三朝御容祭所甚隘，兼歲久屋漏，於石佛寺新影堂奉安爲宜。中書省臣奏：此世祖定制，當仍其舊。制可。

大天源延聖寺 泰定帝紀：泰定三年二月丙申，建顯宗神御殿於盧師寺，賜額曰大天源延聖寺。八月，大

天源延聖寺神御殿成。十月庚辰，奉安顯宗御容於大天源延聖寺。四年十月癸卯，命帝師作佛事於大

天源延聖寺。致和元年三月辛未，大天源延聖寺顯宗神御殿成。此條似重出。 文宗紀：天曆二年五月乙亥，於玉

德殿及大天源延聖寺作佛事。十一月丙辰，命帝師率羣僧作佛事七日於大天源延聖寺。 順帝紀：元統

六年四月庚寅，詔大天源延聖寺立明宗神御殿碑。 后妃傳：明宗八不沙皇后：天曆二年后請爲明宗資

冥福，命帝師率諸僧作佛事七日於大天源延聖寺。

大宣文弘教寺 泰定帝紀：泰定三年十月，中書省臣言：養給軍民必藉地利。世祖建大宣文弘教等寺賜永業，當時已號虛費。而成宗復構天壽萬寧寺，較之世祖用增倍半。若武宗之崇恩福元，仁宗之承華普慶，租權所入，益又甚焉。英宗鑿山開寺，損兵傷農，而卒無益。夫土地祖宗所有，子孫當共惜之。臣恐茲後藉爲口實，妄興工役，徼福利以逞私欲。惟陛下察之。帝嘉納焉。

大承天護聖寺 文宗紀：天曆二年五月乙丑，建大承天護聖寺。至順二年九月乙亥，命留守司發軍士築駐蹕臺於大承天護聖寺東。庚寅，幸大承天護聖寺。十月癸丑，幸大承天護聖寺。三年正月丁亥，幸大

承天護聖寺。五月戊寅，幸大承天護聖寺。順帝紀：元統元年十月庚辰，奉文宗皇帝及太皇太后御容

於大承天護聖寺。順帝紀：至正元年四月庚寅，帝幸護聖寺。十三年三月甲申，詔修大承天護聖寺，賜

鈔二萬錠。后妃傳：文宗卜筮失里皇后；天曆二年，后以銀五萬兩助建大承天護聖寺。

大興教寺。成宗紀：大德五年二月戊戌，賜興教寺地百頃。仁宗紀：皇慶五年十月壬辰，建帝師巴思八

殿宇於大興教寺。六年三月壬午，賜大興教寺僧齋食鈔二萬錠。英宗紀：至治二年十月甲申，建太祖

神御殿於興教寺。禮樂志見聖壽萬安寺下。鐵木迭兒傳：取興教寺後墻園地三十畝。

大乾元寺。仁宗紀：皇慶六年六月壬子，賜大乾元寺鈔萬錠，俾營子錢供繕修之費。泰定帝紀：泰定二

年七月癸亥，修大乾元寺。三年七月甲寅，幸大乾元寺。順帝紀：元統三年七月壬子，幸乾元寺。又案

紀：大德五年二月壬戌，賜上都乾元寺地九十頃。英宗紀：延祐七年二月己巳，罷上都乾元寺規運總管府。順帝紀：至正七年三月壬申，遣使修上都大乾元寺。則上都亦有大乾元寺也。

大永福寺。英宗紀：延祐七年二月壬子，罷造永福寺。戊午，建御容殿於永福寺。至治元年二月，大永福

寺成。泰定帝紀：泰定二年正月甲辰，奉安顯宗像於永福寺，給祭田百頃。

聖安寺。祭祀志：世祖中統二年九月庚申，奉遷祖宗神主於聖安寺。辛巳，藏於瑞像殿。世祖紀世祖紀：

中統三年十一月丁亥，勅聖安寺作佛頂金輪會。王磐傳：皇太子賜宴聖安寺。

昊天寺。世祖紀：中統三年十二月戊寅，作佛事於昊天寺，七晝夜。武宗紀：至大元年十一月辛巳，以

銀七百五十兩、鈔二千二百錠、幣帛三百疋施昊天寺，爲水陸大會。

慶壽寺。世祖紀：至元三年四月庚午，勅僧道祈福於中都寺觀。詔以僧機爲總統，居慶壽寺。文宗紀：

至順二年三月甲申，繪皇太子眞容，奉安慶壽寺之東鹿頂殿，祀之如累朝神御殿儀。

天衣寺 世祖紀：至元二十一年九月丙申，以江南總攝楊璉眞加發宋陵冢所收金銀寶器修天衣寺。

智全寺 泰定帝紀：泰定四年正月庚申，皇子允丹藏卜受佛戒於智全寺。

鎮國寺 泰定帝紀：致和元年三月庚辰，命僧千人修佛事於鎮國寺。

石佛寺 順帝紀：元統六年正月甲戌，立司禪監，奉太祖、太宗、睿宗三朝御容於石佛寺。 兵志：英宗至

治元年正月，帝詣石佛寺。以牆垣疏壞，命副樞朮溫台、僉院阿散領圍宿士卒以備巡邏。

延徽寺 順帝紀：元統六年二月丁未，立延徽寺以奉寧宗祀事。

永明寺 順帝紀：至正元年正月，命永明寺寫金字經一藏。

長慶寺 順帝紀：至正二十七年六月，長慶寺有龍纏繞槐樹飛去，樹皮皆剝。

興禪寺 禮樂志：國史院進先朝實錄儀：中書命左三部、太常寺、少府監於興禪寺置局。

灌頂寺 英宗紀：至治元年十二月，車駕幸西僧灌頂寺。

大悲寺 宦者朴不花傳：至正十八年，京師大饑疫，死者相枕藉。不花欲要譽一時，請於帝，市地收瘞之。

帝賜鈔七千錠，宮中及興聖、隆福兩宮，皇太子，皇太子妃賜金銀及他物有差。省院施者無算。不花出玉

帶一、金帶一、銀二錠、米三十四斛、麥六斛、青貂銀鼠裘一襲以爲費。擇地自南北兩城抵盧溝橋，掘深及

泉，男女異壙，人以一屍至者，隨給以鈔，兒負相踵。既覆土，就萬安壽慶寺當非慶壽寺建無遮大會。至二十年

四月，前後瘞者二十萬，用鈔二萬七千九十餘錠，米五百六十餘石。又於大悲寺修水陸大會三晝夜。

寶集寺 見香殿下

白塔 世祖紀：至元二十八年五月丁巳，建白塔二，各高一丈一尺。以居咒師朶朶四的性吉等七人。
又見大聖壽萬

安寺
下。

城南佛寺 武宗紀：至大元年三月戊寅，建佛寺於大都城內。二年九月，以大都城南建佛寺，立行工部。

壽安山寺 英宗紀：延祐七年九月甲申，建壽安山寺，給鈔千萬貫。十月庚午，命拜往督造壽安寺。至治

元年正月己亥，以壽安山造佛寺，置庫掌財帛。二年九月辛亥，幸壽安山寺。泰定帝紀：泰定元年二月

己未，修西番佛事於壽安山寺。文宗紀：至順二年正月丁亥，以壽安山英宗所建寺未成，詔中書省給鈔

十萬錠供其費。張思明傳：英宗造壽安山寺，監察御史觀音保、鎖咬兒、哈的迷失、成珪、李謙亨強諫。

帝震怒，殺觀音保、鎖咬兒、哈的迷失，以成珪、李謙亨屬吏。張珪傳：奏言：比者建西山寺，損軍害民，

費以億萬計。

長春宮 世祖紀：中統三年十一月丁亥，勅長春宮設金籙周天醮。至元元年三月庚辰，設周天醮於長春

宮。五年九月丁巳，勅長春宮修金籙周天大醮七晝夜。十一年正月丁酉，長春宮設周天金籙醮七晝夜。

十四年二月，命嗣漢天師張宗演修周天醮於長春宮。十五年十二月庚子，勅長春宮修金籙大醮七晝夜。

十六年十二月，勅自明年正月朔日建醮於長春宮凡七日，歲以爲例。文宗紀：天曆二年十月癸卯，命道

士苗道一建醮於長春宮。順帝紀：元統三年六月癸未，設醮長春宮。丘處機傳：有旨改賜宮名曰長

春。

崇眞宮 英宗紀：延祐七年七月，命玄教宗師張留孫修醮事於崇眞宮。

太一廣福萬壽宮 世祖紀：至元十一年十二月癸亥，賜太一真人李居素第一區，仍賜額曰太一廣福萬壽

宮。

玉虛宮

天寶宮 釋老傳：酈希誠居燕城天寶宮。

太乙宮 釋老傳：至元十一年，建太乙宮於兩京，命李居素居之，領祠事，且禋祀六丁，以繼太保劉秉忠之

術。文宗紀：天曆二年十一月丙辰，命道士建醮於玉虛、天寶、太乙、萬壽四宮。后妃傳同。

昭應宮 世祖紀：至元七年二月甲戌，築昭應宮於高粱河。成宗紀：大德五年二月戊戌，賜昭應宮地百

頃。

北平考卷五

香山 金史世宗紀：大定二十六年三月癸巳，香山寺成。幸其寺，賜名大永安寺。 章宗紀：明昌四年三

月甲申，幸香山永安寺及玉泉山。 承安三年七月丙午，幸香山。 八月癸酉，獵於香山。 四年八月壬申，獵

於香山。 五年八月壬辰，幸香山。 泰和元年六月己卯，幸香山。 六年九月丙戌，幸香山。 巨構傳：大定

中，詔與近臣同經營香山行宮及佛舍。 蒲察鼎壽傳：喪至香山，皇太子往奠，百官致祭。 胡礪傳：天

會間，大軍下河北。礪爲軍士所掠，行至燕，亡匿香山寺。 元史仁宗紀：皇慶元年四月辛未，給鈔萬錠，

修香山永安寺。 英宗紀：延祐七年四月己未，祭遁甲神於香山。今香山有金章宗祭星臺，於史無所考，或是元時祭遁甲神之地。 鐵哥傳：世

宗幸香山永安寺，見書畏吾字於壁，問誰所書。僧對曰：師兄子鐵哥書也。帝召見，愛其容儀秀麗，語音

清亮，命隸丞相孛羅，備宿衛。

玉泉山 金史章宗紀：明昌元年八月壬辰，幸玉泉山。 六年四月丙子，幸玉泉山。 承安元年八月癸丑，幸

玉泉山。 泰和元年五月壬戌，幸玉泉山。 三年三月甲午，如玉泉山。 七年五月己丑，幸玉泉山。 地理

志：宛平有玉泉山行宮。 元史世祖紀：至元十五年十二月丙午，禁玉泉山樵採漁弋。

西山 元史文宗紀：天曆二年八月，遣道士毛穎遠祭遁甲神於上都南屏山、大都西山。

盧溝河 盧溝橋盧作 金史世宗紀：大定二十六年五月戊子，盧溝決於上陽村，湍流成河，遂因之。 章

宗紀：大定二十九年六月，作盧溝石橋。 明昌三年三月癸未，盧溝石橋成。 河渠志：大定十年，議決盧

溝河以通京師漕運，未果行。十一年十二月，省臣奏復開之，自金口疏導至京城北，入濠而東，至通州之北入潞水。及渠成，以地勢高峻，水性渾濁，峻則奔流漩洄，齧岸善崩，濁則沉淖淤塞，積滓成淺，不能乘舟。竟不能行而罷。二十五年五月，盧溝決於上陽村。

世宗紀作二十六年

先是決顯通寨，詔發中都三百里內民夫塞之。

至是復決，朝廷恐枉費工物，遂令且勿治。二十七年三月，宰臣以孟家山金口牖下視都城高一百四十餘尺，止以射糧軍守之，恐不足恃。倘遇暴漲，人或爲姦，其害非細。若固塞之，則所灌稻田俱爲陸地，種植禾麥，亦非曠土。不然則更立重牖，乃於岸上置埽官廨署及埽兵之室，庶幾可以無虞也。上是其言，遣使塞之。

世宗紀同。

禮志作十九年，無月日。

四月丙子，詔封盧溝水神爲安平侯。二十八年五月，詔盧溝河使旅往來之津要，

令建石橋。未行而世宗崩。章宗大定二十九年六月，復以涉者病河流湍急，詔命造舟。既而更命建石橋。明昌三年三月成，勅命名曰廣利。官建東西廊，令人居之。六月，盧溝隄決，

路繹傳作四年。

詔速遏塞之，無令泛濫

爲害。右拾遺路鐸上疏言：當縱水勢分流以行，不必補修玄同口以下丁村以上舊隄。上命宰臣議之，遂命工部尙書胥持國與鐸同視其隄道。

徒單克寧傳：盧溝河決久不能塞，加封安平侯。久之，水復故

道。元史河渠志：盧溝河，其源出於代地，名曰小黃河，以流濁故也。自奉聖州界流入宛平縣境，至都城四十里東麻谷，分爲二派。太宗七年，勅劉冲祿管領，禁人盜決，犯者以違制論。

世祖紀：至元三年

十二月，建大安閣於上都。鑿金口，導盧溝水以漕西山木石。成宗紀：大德六年四月戊子，修盧溝上流石徑山河隄。

文宗紀：天曆元年十月甲午，脫脫木兒章吉與也先捏合擊敵軍於良鄉南，轉戰至盧溝橋。

忽刺台被創，據橋而宿。乙未，燕鐵木兒率軍循北山而西，趨良鄉。諸將時與忽刺台、阿刺帖木兒等戰於盧溝橋，聲言燕鐵木兒大軍至，敵兵皆遁。順帝紀：至正十四年四月，造過街塔於盧溝橋。阿刺瓦而

思傳：從擊忽刺台，馬札罕等軍於盧溝橋，敗之，追至紫荆關，多所俘獲。燕鐵木兒傳：上都諸王忽刺台等入紫荆關，犯良鄉，游騎逼南城。燕鐵木兒即率諸將兵循北山而西，晨夜兼程，至於盧溝河。王楫傳：議田野久荒而兵後無牛，宜差官盧溝橋索軍回所驅牛，十取其一以給農民。用其說得數千頭，分給近縣。民大悅，復業者衆。

金口河見盧溝河下。元史順帝紀：至正二年正月丙戌，開京師金口河，深五十尺，廣一百五十尺，役夫一十萬。郭守敬傳：守敬言：金時自燕京之西麻峪村分引盧溝，一支東流，穿西山而出，是謂金口。其水自金口以東，燕京以北，灌田若干頃，其利不可勝計。兵興以來，典守者懼有所失，因以大石塞之。今若按視故蹟，使水得通流，上可以致西山之利，下可以廣京畿之漕。又言：當於金口西預開減水口西南還大河，令其深廣，以防漲水突入之患。帝善之。河渠志：至正二年正月，中書參議宇羅帖木兒、都水傅佐建言：起自通州南高麗莊，直至西山石峽鐵板開水古金口一百二十餘里，創開新河一道，深五丈，廣二十丈，啟西山金口水東流至高麗莊，合御河，接引海運，至大都城內輸納。是時脫脫爲中書右丞相，以其言奏而行之。廷臣多言其不可，而左丞許有壬言尤力。脫脫排羣不納，務於必行。有壬因條陳其利害，略曰：大德二年，渾河水發爲民害，大都路都水監將金口下閉閘板。五年間渾河水勢浩大。郭太史恐衝沒田，薛二村南北二城，又將金口已上河身用砂石雜土盡行堵閉。至順元年，因行都水監郭道壽言金口引水過京城至通州，其利無窮。工部官并河道提舉司大都路及合屬官員耆老等相視議擬，水由二城中間窒礙，又盧溝河自橋至合流處自來未嘗有漁舟上下，此乃不可行船之明驗也。且通州去京城四十里，盧溝止二十里，此時若可行船，當時何不於盧溝立馬頭，百事近便，却於四十里外通州爲之？又西山水勢高峻，亡金

時在都城之北流入郊野，縱有衝決，爲害亦輕。今則在都城西南，與昔不同。此水性本湍急，若加以夏秋霖潦漲溢，則不敢必其無虞。宗廟社稷之所在，豈容僥倖於萬一？若一時成功，亦不能保其永無衝決之患。且亡金時此河未必通行，今所有河道遺蹟安知非作而復輟之地乎？又地形高下不同，若不作閘，必致走水淺澀，若作閘以節之，則沙泥渾濁，必致淤塞。每年每月，專人挑洗，蓋無窮盡之時也。且郭太史初作通惠河時，何不用此水而遠取白浮之水引入都城以供閘具之用？蓋白浮之水澄清，而此水渾濁不可用也。丞相不從，遂以正月興工，至四月功畢，起閘放金口水。流湍勢急，沙泥壅塞，船不可行。而開挑之際，毀民廬舍墳塋，夫丁死傷甚衆。又費用不貲，卒以無功。繼而御史糾劾建言者，李羅帖木兒、傅佐俱伏誅。

通惠河 元史世祖紀：至元二十九年八月丙午，用郭守敬言，浚通州至大都漕河十有四，役軍匠二萬人，又鑿六渠灌昌平諸水。三十年七月丁丑，賜新開溝河名曰通惠。仁宗紀：延祐六年十月己卯，浚通惠河。文宗紀：天曆二年八月乙巳，發諸衛軍浚通惠河。河渠志：通惠河，其源出於白浮壘山諸泉水也。

世祖至元二十八年，都水監郭守敬奉詔興舉水利，因建言疏鑿通州至都河，改引渾水溉田，於舊牐河蹤跡導清水，上自昌平縣白浮村引神山泉西折南轉，過雙塔、榆河、一畝、玉泉諸水至西門，入都城，南匯爲積水潭，東南出文明門，東至通州高麗莊，入白河。總長一百六十四里一百四步。塞清水口一十二處，共長三百一十步。壩牐一十處，共二十座。節水以通漕運，誠爲便益。從之。首事於至元二十九年之春，告成於三十年之秋，賜名曰通惠。丞相以下皆親操畚鍤，爲之倡。船旣通行，公私兩便。先時通州至大都五十里，陸輓官糧歲若千萬，民不勝其悴，至是皆罷之。其壩牐之名曰廣源牐，西城牐二，上牐在和義門

外西北一里，下牖在和義水門西三步。海子牖在都城內。文明牖二，上牖在麗正門外水門東南，下牖在文明門西南一里。魏村牖二，上牖在文明門東南一里，下牖西至上閘一里。籍東牖二，在都城東南王家莊。郊亭牖二，在都城東南二十五里銀王莊。通州牖二，上牖在通州西門外，下牖在通州南門外。楊尹牖二，在都城東南三十里。朝宗牖二，上牖在萬億庫南百步，下牖去上牖百步。成宗元貞元年，改西城牖名會川，海子牖名澄清。泰定帝紀：泰定三年八月戊寅修澄清石牖。文明牖仍用舊名，魏村牖名惠和，籍東牖名慶豐，郊亭牖名平津，通州牖名通流，河門牖名廣利，楊尹牖名薄濟。武宗至大四年六月，省臣言：通州至大都運糧河牖，始務速成，故皆用木，歲久木朽，一旦俱敗，然後致力，將見不勝其勞。今爲永固計，宜用磚石以次修治。從之。後至泰定四年始修完焉。郭守敬傳：二十八年，有言灤河自永平挽舟踰山而上，可至開平，有言盧溝自麻峪可至尋麻林。朝廷遣守敬相視，灤河既不可行，盧溝舟亦不通。守敬因陳水利十有一事：其一大都運糧河不用一畝泉舊原，別引北山白浮泉水西折而南，經甕山泊，自西水門入城，環滙於積水潭，復東折而南，出南水門，合入舊運糧河。每十里置一牖，北至通州，凡爲牖七。距牖里許，上重置斗門，互爲提闕以過舟止水。帝覽奏喜曰：當速行之。於是復置都水監，俾守敬領之。帝命丞相以下皆親操畚鍤倡工，待守敬指授而後行事。先是通州至大都陸運官糧歲若干萬石，方秋霖雨，驢畜死者不可勝計。至是皆罷之。三十年，帝還自上都，過積水潭，見舳艫蔽水，大悅，名曰通惠河。賜守敬鈔萬二千五百貫，仍以舊職兼提調通惠河漕運事。守敬又言：於澄清牖稍東引水與北壩河接，且立牖麗正門西，令舟楫得環城往來。志不就而罷。博爾忽傳：至元二十八年，都水使者請鑿渠西，導白浮諸水，經都城中，東入潞河，則江淮之舟旣達廣濟渠，可直泊於都城之滙。帝亟欲其成，又不欲役其細民，敕四怯薛人及諸府人專其

役，度其高深，畫地分賦之，刻日使畢工。月赤察兒率其屬著役者服，操畚鍤，即所賦以倡，趨者雲集，依刻而渠成，賜名曰通惠河。公私便之。高源傳：至元二十八年，遷都水監。開通惠河，由文明門東七十里與會通河接，置閘七，橋十二，人蒙其利。

壩河 元史河渠志：壩河亦名阜通七壩。成宗大德六年三月，京畿漕運司言：歲漕米百萬，全藉船壩夫力，自冰開發運，至河凍時止，計二百四十日，日運糧四千六百餘石。所轄船夫一千三百餘人，壩夫七百三十，占役俱盡，晝夜不息。今歲水漲，衝決壩隄六十餘處，雖已修畢，恐霖雨衝圯，走泄運水，以此點視河隄淺澀低薄去處，請加修理。深溝壩九處，王村壩二處，鄭村壩一處，西陽壩三處，郭村壩三處，千斯壩下一處，總用工三萬二百四十。元史羅璧傳：浚阜通河而廣之，歲增漕六十餘萬石。

玉泉河 元史世祖紀：至元三年八月己丑，郭守敬請開玉泉水以通漕運，從之。英宗紀：至治元年十二月甲寅，疏玉泉河。泰定帝紀：泰定元年八月丁丑，罷浚玉泉山河役。郭守敬傳：世祖召見，面陳水利六事，其一，中都舊漕河東至通州，引玉泉水以通舟，歲可省僱車錢六萬緡。蓋苗傳：文宗幸護國仁王寺，泛舟玉泉。

金水河 元史河渠志：其源出於宛平縣玉泉山，流至義和門南水門入京城，故得金水之名。至元二十九年二月，中書右丞馬速忽等言：金水河所經運石大河及高良河、西河俱有跨河跳槽，今已損壞，請新之。是年六月興工，明年二月工畢。至大四年七月，奉旨引金水河水注之光天殿西花園石山前舊池，置牯四以節水。閏七月興工，九月成。英宗紀：至治三年四月己巳，浚金水河。文宗紀：至順二年五月，調衛兵浚金水河。順帝紀：至正十五年十二月，詔浚大內河道。

隆福宮前河。其水與太液池通，英宗至治二年五月，奉勅云：昔在世祖時，金水河濯手有禁，今則洗馬者有之。比至秋疏濬，禁諸人毋得污穢。於是會計修浚，三年四月興工，五月工畢。

海子岸。上接龍王堂，以石甃其四周。海子一名積水潭，聚西北諸泉之水，流行入都城而匯於此，汪洋如海，都人因名焉。仁宗延祐六年二月，都水監計會前後與元修舊石岸相接。月五日興工，十一日工畢。

至治三年三月，大都河道提舉司言：海子南岸東西道路，當兩城要衝，金水河浸潤於其上，海子風浪衝噴於其下，且道狹，不時潰陷泥濘，車馬艱於往來，請以石砌之。泰定元年四月，工部應副工物，七月興工，八月工畢。

高梁河梁一作良。水經注見上。遼史景宗紀：乾亨元年七月癸未，耶律沙等及宋兵戰於高梁河，少却，耶律

休哥，斜軫橫擊，大敗之。元史泰定帝紀：至治三年十一月癸丑，勅會福院奉北安王那木罕像於高良河

寺。文宗紀：至順三年三月乙未，以帝師泛舟於西山高梁河，調衛士三百挽舟。阿合馬傳：獲高和尚

於高梁河。

故宮遺錄

故宮遺錄序

故宮遺錄者，廬陵蕭洵之所撰也。革命之初，任工部郎中，奉命隨大臣至北平，毀元舊都，因得徧閱經歷，凡門闕樓臺殿宇之美麗深邃，闌檻瑣窗屏障金碧之流輝，園苑奇花異卉峯石之羅列，高下曲折，以至廣寒秘密之所，莫不詳具該載，一何盛哉！自近古以來未之有也。觀此編者，如身入千門萬戶，猶登金馬，歷玉階，高明華麗，雖天上之清都，海上之蓬瀛，尤不足以喻其境也。洵因宰湖之長興，將鏤諸梓而不果，遂傳於是邦。余因館於呂山，友人高叔禎氏出示余，因假而錄之，以遺好奇之士云。時洪武丙子花朝日，松陵生吳節伯度序。

故宮遺錄者，錄元之故宮也。洪武元年滅元，命大臣毀元氏宮殿。廬陵工部郎蕭洵實從事焉。因而紀錄成帙。有松陵吳節爲之序。予於萬曆三十六年間得於吳門書攤上，字畫故暗不可句，因爲校錄一過。三十八年庚戌，於金陵得張浙門墨本，爲校正數十字，置之籙中。四十四年丙辰十一月於金臺與劉元岳縱言，至於燕京往跡，一無可稽，聞有元耶律楚材燕山志，及國初北平志，但耳其名，未目其文也。忽然憶有此書，因檢之奚囊，幸以自隨。兩人相與擊節。金臺蕪滅，基構不存，耶律、完顏二氏經營，亦落荒草，鐵木真氏幸有茲編，稍不墮地，然庚申荒迷亡國，跡之令人悲悵。清寫一帙，以備修史采錄云。時萬曆四十四年仲冬廿二日呵凍書。是日大風，二十日四鼓，大內又火延禧殿，并記。清常道人趙琦美。

故宮遺錄

廬陵虎溪 蕭洵編

南麗正門內曰千步廊，可七百步，建靈星門。門建蕭牆，周迴可二十里，俗呼紅門闌馬牆。門內數一作十步許有河，河上建白石橋三座，名周橋，皆琢龍鳳祥雲，明瑩如玉。橋下有四白石龍，擊戴水中，甚壯。繞橋盡高柳，鬱鬱萬株，遠與內城西宮海子相望。度橋可二百步爲崇天門。門分爲五，總建闕樓其上，翼爲回廊，低連兩觀。觀一無下旁出爲十字角樓，高下三級。兩旁各去午門百餘步有掖門，皆崇高閣。內城廣可六七里，方布四隅，隅上皆建十字角樓。其左有門爲東華，右爲西華。由午門內可數十步爲大明門，仍旁建掖門，繞爲長廡，中抱丹墀之半。左右有一作文武樓，樓與廡相連。中爲大明殿，殿基高可十一作尺，前爲殿陛，納爲三級，繞置龍鳳白石闌。闌下外一作每楯一作壓以鼉頭，虛出闌外，四繞於殿。殿楹四向皆方柱，大可五六尺，飾以起花金龍雲。楹下皆白石龍雲花頂，高可四一作尺，楹上分間仰爲鹿頂斗拱，攢頂中盤黃金雙龍。四面皆緣金紅瓊窗，間貼金鋪，中設山字一作玲瓏金紅屏臺，臺上置金龍牀，兩旁有二毛皮伏虎，機動如生。二無上十殿右連爲主廊十二楹，四周金紅瓊窗，連建後宮，廣可三十步，深入半之，不顯列。一作楹架，四壁立，至爲高曠，通用絹素冒之，畫以龍鳳。中設金屏障。障後即寢宮，深止十尺，俗呼爲弩頭殿。龍牀品列爲三，亦頗渾樸。殿前宮東西仍相向爲寢宮，中仍金紅小平牀，上仰皆爲實研龍骨方榻，緣以彩雲金龍鳳，通壁皆冒絹素，畫以金碧山水。壁間每有小雙扉，內貯裳衣，前皆金紅推窗，間貼金

花，夾以一作中玉版明花油紙，外籠黃油絹幕，至冬則代以油皮。內寢屏障重覆帷幄，而裹以銀鼠，席地皆

編細簾，上加紅黃厚氈，重覆茸單。至寢處牀座，每用綉褥，必重數疊，然後上蓋納失失，再加金花，貼薰

異香，始邀臨幸。宮後連抱長廡，以通前門。前繞金紅欄檻，畫列花卉，以處妃嬪。而每院間必建三，東西

向爲牀，一作欄壁間亦用絹素冒之，畫以丹青。廡後橫亘長道，中爲一作以延春堂，丹墀皆植青松，即萬年

枝也。門廡殿制，大略如前。甃地皆用濬州花版石甃之，磨以核桃，光彩若鏡。中置玉臺牀。一有兩旁有毛

如生前設金酒海，四列金紅小連。一作連其上爲延春閣，梯級由東隅而升，長短凡三折而後登，雖至幽暗，闌

楯皆塗黃金雲龍，冒以丹青絹素，上仰亦皆拱爲攢一作鹿頂，中盤金龍。四周皆繞金珠瑣窗，窗外繞護金紅闌

干，凭望至爲雄傑，宮後仍爲主廊。后宮寢宮，大略如前。廊東有文思小殿，西有紫檀小殿，後東有玉德

殿，殿楹拱皆貼白玉龍雲花片，中設白玉金花山字屏臺，上置玉牀。又東爲宣文殿，旁有秘密堂。西有鹿

頂小殿，前後散爲便門，高下分引而入，彩闌翠閣，間植花卉松檜，與別殿飛臺凡數座。又後爲清寧宮，宮

制大略亦如前。宮後引抱長廡，遠連延春宮，其中皆以處嬖幸也。外護金紅欄檻，各植花卉異石。又後

重繞長廡，前一作別。虛御道，再護雕闌，又以處嬖嬙也。又後爲厚載門，上建高閣，環以飛橋，舞臺於前，回闌

引翼。每幸閣上，天魔歌舞於臺，繁吹導之，自飛橋而升，市人聞之，如在霄漢。臺東百步有觀星臺。臺旁

有雪柳萬株，甚雅。臺西爲內浴室，有小殿在前。由浴室西一作而。出內城，臨海子。海廣可五六里，駕飛橋於

海中，西渡半起瀛洲圓殿，繞爲石城圍門，散作洲島拱門，以便龍舟往來。由瀛洲殿後北引長橋，上萬歲

山，高可數十丈，皆崇奇石，因形勢爲巖岳。前拱石門三座，面直瀛洲，東臨太液池，西北皆俯瞰海子。由

三門分道東西而升，下有故殿基，金主圍棋石臺盤。山半有方壺殿，四通，左右之路，幽芳翠草紛紛，與松

檜茂樹蔭映上下，隱然仙島。少西爲呂公洞，尤爲幽邃。洞上數十步爲金露殿。由東而上，爲玉虹殿。殿前有石巖如屋，每設宴，必溫酒其中更衣。玉虹金露，交馳而繞層闌，登廣寒殿。殿皆線金朱瑣窗，綴以盤金龍。殿有間玉金花玲瓏屏臺牀四，列金紅連椅，前置螺甸酒卓，高架金酒海。窗外出爲露臺，繞以白石花闌。旁有鐵竿數丈，上置金葫蘆三，引鐵練以繫之，乃金章宗所立，以鎮其下龍潭。凭闌四望空闊，前瞻瀛洲，仙橋與三宮臺殿，一作樓金碧流暉；後顧西山雲氣，與城闕翠華高下。一作縹緲而海波迤迤，一作麗天宇低沈，欲不謂之清虛之府不可也。山左數十步，萬柳中有浴室，前有小殿。由殿後左右而入，爲室凡九，皆極明透，交爲窟穴，至迷所出路。中穴有盤龍，左底叩首而吐吞一丸於上，注以溫泉，九室交涌，香霧從龍口中出，奇巧莫辨。自瀛洲西度飛橋上回闌，巡紅牆而西，則爲明仁宮，一作殿沿海子導金水河步遽河南行爲西前苑。苑前有新殿，半臨邃河，河流引自瀛洲西遽地，而繞延華閣，閣後達於興聖宮，復遽地西折啄嘶，一作禾嘶後老宮而出，抱前苑，復東下於海，約遠三四里。龍舟大者，長可十丈，繞設紅綵闌，前起龍頭，機發五竅皆通。餘船三五，亦自奇巧。引挽游幸，或隱或出，已覺忘身，況論其他哉！新殿後有水晶二圓殿，起於水中，通用玻璃飾，日光回彩，宛若水宮。中建長橋，遠引修衢而入嘉禧殿。橋旁對立二石，高可二丈，闊止尺餘，金彩光芒，利鋒如斲。度橋步萬花入懿德殿，主廊寢宮，亦如前制，乃建都之初基也。由殿後出掖門，皆叢林，中起小山，高五十丈，分東西延緣而升，皆崇怪石，間植異木，雜以幽芳，自頂繞注飛泉，巖下穴爲深洞，有飛龍噴雨其中。前有盤龍，相向舉首而吐流泉，泉聲夾道交走，泠然清爽，又一幽迴，髣髴仙島。山上復爲層臺，回闌邃閣，高出空中，憑憑遙接廣寒殿。山後仍爲寢宮，連長

廡。廡後兩繞遼河，東流金水，亘長街，走東北，又繞紅牆，可二十步許，爲光天門。仍開左右掖門，而繞長廡，中爲光天殿。殿後主廊如前，但廊後高起爲隆福宮，四壁冒以絹素，上下畫飛龍舞鳳，極爲明曠。左右後三向，皆爲寢宮，大略亦如前制。宮東有沈香殿，西有寶殿，長廡四抱，與別殿重闌曲折掩映，尙多莫名。又後爲興聖宮，丹墀皆萬年枝。殿制比大明差小。殿東西分一作殿後外道爲閣門，出繞白石龍鳳闌楯，欄楯上每柱皆飾翡翠，而寘黃金鵬鳥獅座。中建小直殿，引金水繞其下，甃以白石。東西翼爲仙橋，四起雕窗，中抱彩樓，皆爲鳳翅飛簷，鹿頂層出，極盡巧奇。樓下東西起日月宮，金碧點綴，欲像扶桑滄海之勢。壁間來往多便門出入，有莫能窮。樓後有禮天臺，高跨宮上，碧瓦飛甍，皆非常制。盼望上下，無不流輝，不覺奪目，亦不知蓬瀛仙島又果何似也。又少東，有流杯亭，中有白石牀如玉，臨流小座，散列數多。刻石爲水獸，潛躍其旁，塗以黃金。又皆親制水鳥浮杯，機動流轉而行，勸罰必盡歡洽，宛然尙在目中。繞河沿流，金門翠屏，回闌小閣，多爲鹿頂，鳳翅重簷，往往於此臨幸，又不能悉數而窮其名。總引長廡以繞之。又少東，出便門，步遼河上，入明仁殿，主廊後宮，亦如前制。宮後爲延華閣，規制高爽，與延春閣相望，四向皆臨花苑。苑東爲端本堂，上通冒青紵絲。又東，有棕毛殿，皆用棕毛以代陶瓦。少西，出掖門爲慈仁殿。又後苑中有金殿，殿楹窗扉皆裹以黃金，四外盡植牡丹，百餘本高可五尺。又西有翠殿，又有花亭一作甃閣，環以綠牆獸闌，綠障魀窗，左右分布，異卉幽芳，參差映帶。而玉牀寶座，時時如沍流香，如見扇影，如聞歌聲，出戶外而若度雲霄，又何異人間天上也！金殿前有野果名姑娘，外垂絳囊，中空如桃，子如丹珠，味甜酸可食，盈盈繞砌，與翠草同芳，亦自可愛。苑後重繞長廡，廡後出內牆，東連海子，以接厚載門。繞長廡中皆宮娥所處之室。後宮約千餘人，掌以闈寺，給以日飯，又何盛也！庚申以荒淫久廢朝

政。洪武元年爲諸將叛背，捐棄宗廟社稷而逃走依西北，蓋立彼蒙古之國，逾年不爲所容，思庇翁吉刺氏魯王所封之國以求生，即應昌府也。府有西江焉。庚申心知不可爲已，因泣數行下，未幾，以痢疾崩。子愛猷識理達臘立五日，我師奄至。愛猷識理達臘僅以身免。二后、愛猷識理達臘妻子及三宮妃嬪、扈衛諸軍將帥、從官悉俘以還，元氏遂滅。至是始驗指望兌生涯，死在西江月下云。

K291/10=2

統一書號： 12071 · 17

定 價： (7) 0.33 元